

Is Surat Ni Epustul Pablo Ziyà Te Menge TigRuma

Is Mehitenged te Surat Diyà te TigRuma

Hengkey is paagi wey mezawat te Megbevayà is etew? Iyan heini he insà midtavak ni Pablo kayi te surat din he para te menge tumutuu ziyà te Ruma.

Is duma egkagi te iyan dà egkezawat te Megbevayà is etew he egketuman din is langun duen te kesuguan he imbilinbilin ni Moises dengan. Iyan, iyan mulà impesavut ni Pablo he wazà minsan sevaha he egkezawat te Megbevayà tenged te meupiya he menge vaal zin etawa tenged te menge kepuun din, su mekesesalà is langun he menge etew ne zait he ebpekesuwey te Megbevayà ne edsilutan te silut he wazè din pidtemanan. Ne zuen sevaha zà he paagi wey mezawat te Megbevayà is etew he iyan is kedtuuwi wey kedserigi ki Jesu Kristu.

Uteu ingkeseeng ni Pablo is duma zin he menge Hudiyu su kenà sikandan edtuu ki Jesu Kristu. Neuget en is kebperetenga zan te hadi he ibpahadì te Megbevayà kandan, piru kenè dan edtuu he iyan en si Jesus sikan is hadi he midsugù te Megbevayà he edhadì kandan wey edlibri kandan. Impesavut ni Pablo he egkeuma zed is timpu he ebpesakup en human ki Jesus is menge Hudiyu, ne guntaan iyan pa edhimuwen ni Jesus he menge sakup din is kenà menge Hudiyu. Ne egkeuma zaan is timpu he edsevahaan te Megbevayà is menge Hudiyu wey is kenà menge Hudiyu su pudu zin edhimuwa he sakup din. Emun idsarig te etew ziyà te Megbevayà is untung din, egkehimu zin is kebpezumazuma te Megbevayà pinaagi te gehem te Wagas he Mulin-ulin. Egkevegu is untung din, wey egkehimu zin is kebmalal te zuma, su is etew he midawat en te Megbevayà, kinahanglan daan he edewaten din is duma he etew wey edtevangin din.

1 ^{1,2}Iyan a si Pablo is tegisurat kayi. Uripen a ni Jesu Kristu ne midhimu e zin daan he epustul. Impenaad dengan te Megbevayà pinaagi te impesurat din te menge ebpeneuven din he zuen timpu he zuen Meupiya he Tudtulanen he ibpesavut kenitew. Umba mibpilì a he

epustul su wey a mekepenudtul kayi te Meupiya he Tudtulanen. ³Tudtul heini te keagi te Nengazen tew he si Jesu Kristu he Anak te Megbevayà. Ne heini si Jesus, nehimu he etew su in-anak sikandin he kevuwazan te tipehuna he hadi he si David. ⁴Ne is Nengazen tew he si Jesu Kristu, wagas sikandin he Megbevayà su anak daan sikandin te Megbevayà su impaahà heini kenitew pinaagi te zekelà he gehem te Megbevayà he iyan imbanhew kandin. ⁵Pinaagi ki Jesu Kristu midtuvazan a te Megbevayà su midhimu e zin he epustul, *he ke và dà egkegiya, sugù, su wey mevantug si Jesus. Umba mid-ulaula zin heini su wey ku mepenurù is minge etew he kenà minge Hudiyu ziyà te minsan hendei he inged wey zan mekepemineng ne wey zan meketuu ki Jesu Kristu.* ⁶Ne sikiyu is diyan te inged he Ruma, inragkes kew zaan kayi te minge etew su midhimu te Megbevayà is paagi wey kew meketuu ne wey kew mehimu he minge sakup ni Jesu Kristu.

⁷Ne tenged kayi, ebpesuratan ku sikiyu is langun diyan te inged he Ruma he mahal ziyà te gehinawa te Megbevayà he midhimu zin he minge sakup din.

Is Amey tew he Megbevayà wey is Nengazen tew he si Jesu Kristu, berakat he ikegagew kew zan wey ivegey keniyu is melinawen he kebpekesavuk.

Is Ked-ampù ni Pablo

⁸Iyan idhuna ku keniyu te ebpenudtul is: pinaagi ki Jesu Kristu ebpelemanan ku is Megbevayè tew tenged keniyu su nepenudtul ziyà te minsan hendei is kedtuu niw ki Jesu Kristu. ⁹Tenged te Megbevayà, edhimuwen ku is taman te egkehimu ku wey ku ikesangyew is Meupiya he Tudtulanen mehitenged te Anak din. Ne iyan sikandin nesayud wey ebpeketistigus he layun ku sikiyu id-ampù diyà te kandin. ¹⁰Layun ku sikiyu id-ampù ne edhengyuan ku sikandin he ke egkesuatan din, himuwa zin is paagi he mekehendiyan ad human te keniyu. ¹¹Su utew ku igkesuat is kedhendiyan ku te keniyu, ne egkesuatan ku he ibpenurù ku keniyu is impenurù kediey te Wagas he Mulin-ulin su wey meheget is kedtuu niw te Megbevayà. ¹²Ne iyan ibpesavut ku is ebpein-iniyatè kiw te kedtuu.

¹³Egkesuatan ku, minge suled, he metueni niw he kenà egkeawà dini te isip ku is kegkesuat ku te edhendiyan, iyan, kenè e pa guntaan ebpekehendiyan su zuen edsanggan kedì. Egkesuat a he edhendiyan su pinaagi te kebpenurù ku, kela ke zuen minge etew ziyàn he ebpeketuu ki Jesus, iring te pinaagi te kebpenurù ku, duen minge kenà Hudiyu zaan diyà te zuma he minge inged he nemeketuu kandin. ¹⁴Su iring te zekelà is utang ku te tivuuk he menusiyà ne iyan kebeyazi ku kayi te utang is: ebpenudtulen ku kandan is keagi ni Kristu. Kinahanglan he edweliyan ku is nemeketunghà wey is wazà memeketunghà. Kinahanglan he edweliyan

ku is minge metau wey is minge paglung. ¹⁵Tenged kayi, utew ku zaan egkesuati he ibpenudtul ku is Meupiya he Tudtulanen diyen te keniyu he ziyen te inged he Ruma.

Is Gehem te Meupiya he Tudtulanen

¹⁶Uteu zekelà is kedsarig ku te Meupiya he Tudtulanen su emun edtuuwan heini te minsan hentei, puun te minge Hudiyu pehendiyà te kenà minge Hudiyu, edlibriyen sikandin te silut pinaagi te zekelà he gehem te Megbevayà. ¹⁷Su pinaagi te Meupiya he Tudtulanen ibpetuenan kenitew te Megbevayà is paagi wey kiw zin meisip he metazeng. Ne heini is paagi, ne pinaagi te kedtuu zà. Su zuen insurat he Lalag te Megbevayà he edhenduen te, “Is etew he nehimu he metazeng pinaagi te kedtuu zin, ne iyan ebegayan te untung he wazè din pidtemanan.”

Is Kebpekesalà te Eteu

¹⁸Is Megbevayà diyà te langit, impeehè din en he utew zin igkepauk is langun he minge mezaat he ulaula te minge etew wey is kenè dan kedtahud kandin. Su pinaagi te kelelalung dan egkesanggan is kebpesevuta te tutuu he tuluuwan. ¹⁹Kinahanglan he edsilutan sikandan su melemu zan pezem ebpekesavut te hustu mehitenged te Megbevayà su midhimu heini te Megbevayà he utew keladu. ²⁰Su is Megbevayà, minsan te kenà sikandin egkeahà, puun pa te kedlimbaga zin te kelibutan, egketuusan sikandin gihapun pinaagi te langun he midlimbag din, pinaagi te utew zekelà he gehem din he wazè din pidtemanan, wey pinaagi te nekagi he kegkemegbevayè din. Ne tenged dutun kenà ebpekevarew is minsan hentei he kenè dan egketuenan he zuen Megbevayà. ²¹Su minsan te nesavut dan en he zuen Megbevayà, wey netuenan dan he zait sikandin he edtehuzen, wazè dan sikandin tehuza, ne wazè dan peselemati is gagew zin kandan, kekenà, nehimu he wazè en pulus te egketagù diyà te isip dan. Ne tenged kayi, iring te nezukileman is minge isip dan su kenè dan en ebpekesavut te hustu he ibpesavut pezem kandan te Megbevayà. ²²Ne minsan pa te egkegiyen dan he metau zan he ed-isip, iyan, nehimu zan en he minge taleng. ²³Su kenè dan ed-ezapan is tutuu he mekegegehem he Megbevayà he wazè din kemetayen, kekenà, iyan dan ed-ezapan is minge ledawen he mibeelan dan he iring te minge etew he zuen din kemetayen wey iring te minge tagbis, wey ke minge langgam be, wey ke minge uled.

²⁴Ne tenged kayi mibpesagdan en sikandan te Megbevayà wey zan meulaula is langun he minge meremerik he ulaula he egkesuatan dan. Ne utew mekeeled-eled is ebeelan dan te lawa zan te kada sevaha.

²⁵Kenè dan edtuuwan is tutuu mehitenged te Megbevayà, kekenà, tarù is edtuuwan dan. Ed-ezapan dan wey ebpezumdumahan dan is linimbag

dà duen, kenà is Nenlimbag. Berakat he wazà pidtemanan te kedeliga kandin te menge etew.

²⁶Ne tenged te mibpesagdan te menge etew is Megbevayà, mibpesagdan din daan sikandan wey zan metuman is menge suat dan he utew mahawag. Minsan is menge vahi, ne kenè en maama is edhulizen dan, su iring dan he vahi is igkeerigi zan. ²⁷Ne iring din ded daan is menge maama; kenè en bahi is edhulizen dan su minsan is iring dan he maama ne igkeerigi zan. Ne utew mekeeled-eled is ed-ul-ulahan dan te menge lawa zan. Ne pinaagi te menge kelelalung he ulaula zan nezeetan dan is lawa zan ne nehimu heini he silut he kenè dan egkelikayan.

²⁸Ne geina te egkegiyen dan he wazè en pulus te kedtuwi te Megbevayà, mid-iniyugan sikandan te Megbevayà ne tenged kayi iyan ebayàbayà kandan is kelelalung he netagù diyà te isip dan ne ed-ul-ulahan dan is kenà hustu. ²⁹Iyan dà egkeisip dan is kelelalung wey is mezaat he ulaula. Legezen dan ne meremerik is ulaula zan. Egkesina sikandan; ebpemumunù dan; ebpeeg-egetè dan; edtarùtarù dan; ne ebpesipelahan dan is menge zuma zan. Ed-ituk dan, ³⁰ne edsudien dan is menge zuma zan. Menge kuntada sikandan te Megbevayà. Ne wazè dan kedtahud te minsan hentei. Ebpelavew zan ne edantal zan. Uteu zan metau he ed-isip te menge vegu he paagi te kebaal te mezaat. Kenè dan ebpeming te menge ginikanan dan ³¹ne wazè dan kedsavut te minsan hengkey he meupiya he ulaula. Kenè dan edtumanen is menge pesarig dan ne wazè dan gagew wey hizu. ³²Netuenan dan pezem he ke ed-ul-ulahan dan is menge iring kayi, edsilutan sikandan te kemetayen he wazè din pidtemanan, iyan ebpeniguduwan dan gihapun, ne kenà duen dà taman, su utew zan egkesuat emun egkeehè dan is ulaula te zuma he iring ded te kandan.

Is Hukum te Megbevayà

2 ^{1,2}Netuenan ta he utew metazeng is idsiluti te Megbevayà te menge etew he ed-ulaula te menge mezaat he iring kayi, iyan, sikew is egkagi he utew mezaat heini is menge ulaula kayi te menge etew, wazè nu zaan kebpekegawas su edsudien nu is mezaat he ulaula te zuma, iyan, mezaat daan is ed-ul-ulahan nu. Ne tenged kayi zutun te kedsudia nu kandin, nesudì nu zaan is kenikew he ulaula. ³Ne emun edsilutan te Megbevayà is ed-ulaula te mezaat, sikew is ed-ulaula zaan te mezaat, ne edsudì ka te menge zuma nu, iyan ke pe be kenà siluti zin daan. ⁴Kunaan nu vuwa ke geina te utew mepelevayen wey metulanged is Megbevayà, ne kenè en kinahanglan he ebpezumdumahan nu is menge lalag din. Iyan, iyan ketezengan ke maan is utew veligegawen is Megbevayà su ed-egaken ke zin su wey nu meiniyugi is mezaat he ulaula. ⁵Ne minsan pa zutun, mezesen pa utew is gehinawa nu ne kenè ka egkesuat he ed-iniyug

te mezaat he ulaula; ne kada andew ed-iseg ebmevegat is silut he idrasey kenikew keuzemà dutun te andew te kedsilut te Megbevayà. Ne zutun he timpu ibpeehè din kenitew is metazeng he kedhukum din. ⁶Su ibegey zin diyà te langun is dait he ibegey te kada etew sumalà is mid-ulaula zan. ⁷Iyan, duen menge etew he edhemenan dan is meupiya he ulaula su iyan ed-isipen dan layun is kedeliga wey is kedtulusa kandan keuzemà te Megbevayà wey is kegketehuza zin kandan keuzemà. Ne untung he wazè din pidtemanan is ibegey zin kandan. ⁸Iyan, duen daan duma he menge etew he iyan dan ed-isipen is kandan he egkesuatan ne kenè dan edtuuwan is tutuu he tuluuwen, kekenà, iyan dan edtumanen is kenà hustu. Ne kenà deisek dà is pauk te Megbevayà he ibpeehè din kandan, kekenà, utew mevegat is idsilut din kandan. ⁹Su is langun he menge etew he ed-ulaula te mezaat, lavew en is Hudiyu pehendiyà te kenà Hudiyu, kemeresayan wey kegkeseeng is idsilut kandan. ¹⁰Iyan, is menge etew he ed-ulaula mulà te meupiya, lavew en is Hudiyu pehendiyà te kenà Hudiyu, edtulusen sikandan keuzemà te Megbevayà, ne ibpetehuzan din sikandan ne ibegey zin diyà te kandan is melinawen he kebpekesavuk, ¹¹su is Megbevayà, wazè din ibpelavi te minsan hentei.

¹²Is menge etew he kenà menge Hudiyu, wazè dan metueni ke hengkey is insugù te kesuguan he imbilinbilin ni Moises. Ne ke ebeelan dan is mezaat, edhukuman gihapun sikandan keuzemà te Megbevayà, iyan, kenè din egemiten is kesuguan dutun te kedhukumi zin kandan, ne idsilut din kandan is kemetayen he wazè din pidtemanan. Ne is menge etew he Hudiyu, netuenan dan mulà is insugù dutun te kesuguan, ne emun ebeelan dan is mezaat, edhukuman sikandan te Megbevayà sumalà is nesupak dan dutun te kesuguan. ¹³Su emun iyan ta edserigan is kesuguan, kenè egkehimu he ed-isipen ki te Megbevayà he metazeng pinaagi zà te kebpeking te insugù dutun te kesuguan, kekenà, kinahanglan he wazà minsan hengkey he sayep ta zutun te kedtumana ta te kesuguan. ¹⁴Is menge etew he kenà menge Hudiyu, wazà sikandan mesayud te kesuguan he imbilinbilin ni Moises, iyan, duen timpu he egketuman dan is insugù dutun te kesuguan su minsan pa te kenè dan egketuenan is kesuguan, duen diyà te gehinawa zan ebpekepenurù kandan ke hengkey is meupiya he ed-ul-ulahan. Ne tenged dutun ebpekekagi ki he zuen kesuguan diyà te gehinawa zan. ¹⁵Pinaagi te menge ulaula zan he meupiya egketuusan ta he ibpenurù kandan te gehinawa zan is insugù te kesuguan. Netuenan dan diyà te isip dan ke hengkey is meupiya wey ke hengkey is mezaat he ed-ul-ulahan su zuen ke egkegiyen dan he meupiya is ulaula zan ne zuen ke kegiya zan he mezaat. ¹⁶Ne kenà heini egkelipatan te Megbevayà keuzemà te andew he zutun pinaagi ki Jesu Kristu edsusiyen din is minsan in-eles he menge isip te langun he menge etew. Iyan heini ibpenurù pinaagi kayi te Meupiya he Tudtulanen he idsangyew ku.

Is Kesuguan wey is Menge Hudiyu

¹⁷Ne sikiyu zaan is menge zuma ku he menge Hudiyu, kunaan niw ke egkeserigan niw is kedtumana niw te kesuguan ne ibpezalig niw is upakat niw te Megbevayà. ¹⁸Netuenan niw is egkesuatan te Megbevayà, ne nesavut niw ke hengkey is hustu he ed-ul-ulahan su impenurù keniyu is kesuguan. ¹⁹Kunaan niw ke iyan kew ebpekeagak te menge etew he nengelakap is isip dan, ne kunaan niw zaan ke iyan kew sulù he ebpeketyew te ibayè dan pehendiyà te Megbevayà. ²⁰Kunaan niw ke iyan kew ebpekepenurù te menge etew he wazà mesayud te Megbevayà, ne kunaan niw zaan ke iyan kew ebpekepenudlù te menge etew he sikan pa mekeistudyu te hustu. Umba iyan heini ed-isipen niw su insarig keniyu te Megbevayà is kesuguan ne utew hustu is ketau wey utew tutuu is tuluuwen he ebpuun dutun. ²¹Ebpekepenurù kew te zuma, ne maan is kenè niw ebpenuruen is gehinawa niw? Su ibpenurù niw he kenà meupiya is kebpenakew, iyan, tekawen kew! ²²Ibpenurù niw he mezaat is kegkevuta ta te kenè ta esawa, iyan, egkevuten niw is kenè niw esawa! Utew niw igkeepes is ledawan he ed-ezapen te kenà Hudiyu, iyan, edseled kew zutun te valey he zutun ed-ezapa is menge ledawan wey kew mekepenakew. ²³Ibpezalig niw is kedtumana niw te kesuguan, iyan, edsupak kew gihapun te kesuguan, ne tenged kayi egkesudian is Megbevayà. ²⁴Ne mehitenged kayi, duen impesurat dengan te Megbevayà he edhenduen te, “Tenged keniyu te menge Hudiyu, is menge etew he kenà Hudiyu, edsumpeliten dan is Megbevayà.” Iyan haazà impesurat dengan.

²⁵Sikiyu is menge Hudiyu, kunaan niw ke zekelà is pulus te kebpesirkunsidar niw, ne zuen iyan pulus te kebpesirkunsidar ta emun egkepurungan ta te edtuman is kesuguan, iyan, ke kenè ta egkepurungan te edtuman is kesuguan ne iring ki zed te menge kenà Hudiyu he wazè mebpesirkunsidar. ²⁶Ne iring din ded daan penenglitan, ke zuen etew he kenà Hudiyu ne egkepurungan din te edtuman is kesuguan, edewaten sikandin gihapun te Megbevayà he iring te nesirkunsidar en. ²⁷Ne minsan ke kenà Hudiyu sikandin, pinaagi te kedtumana zin te kesuguan, igkepeehè din he edsilutan kew is menge Hudiyu te Megbevayà su edsupak kew mulà te kesuguan. Ne iyan kew pezem kes mibilvilinan te kesuguan ne iyan kew nesirkunsidar! ²⁸Su is tutuu he Hudiyu, ne kenà iyan dà is Hudiyu he midtuusan is lawa zin pinaagi te kedsirkunsidara kandin, su is tutuu he kedsirkunsidar, ne kenà iyan is kedtuusi te lawa. ²⁹Ne iring din ded daan su is tutuu he Hudiyu, ne iyan is etew he midtuusan te Megbevayà is gehinawa zin pinaagi te Wagas he Mulin-ulin, ne kenà pinaagi te kedtumana te kesuguan. Ne is etew he iring kayi, ne egkehimu he kenà sikandin egkezalig te menge zuma zin he etew, iyan, egkezalig sikandin mulà te Megbevayà.

3 ¹Ne emun iyan haazà, henduen be te wazà pulus te kegkehudiyu zey ne wazà daan pulus te tulumanen dey te kedsirkunsidar. ²Iyan, dekelà iyan is pulus su sikami is menge Hudiyu, insarig kenami is insurat he Lalag te Megbevayà. ³Ne minsan pa te zuen menge zuma zey te menge Hudiyu he wazà mebpemineg te Lalag te Megbevayà, kenà egkehimu he kenà edtumanen te Megbevayà is impenaad din dengan. ⁴Su minsan ke teruen is tivuuk he menusiya, tutuu mulà is minsan hengkey he egkegiyen te Megbevayà. Su zuen insurat dengan he lalag ni Hadì David te kedtistigusi zin te ketazeng te Megbevayà he edhenduen te,
 “Kenà egkehimu he kenà hustu is kenikew he ketezengan,
 su ke idsumbung ka, layun ebpekezaag is kenikew he ketezengan,”
 ke si David.

⁵Ne zuen menge pilusupu he etew he egkagi te, “Emun ed-ulaula ki te mezaat, meupiya zaan haazà su emun egkeisip te menge etew is menge ulaula ta he mezaat, wey is menge ulaula te Megbevayà, siguradu egkesavut dan he utew mulà meupiya is menge ulaula te Megbevayà ne ebpekezalig dan te Megbevayà, ne utew haazà meupiya. Ne emun,” ke sikandan, “nehimu is meupiya tenged te mezaat he mid-ulaula ta, kenà metazeng is kedsiluti kenita te Megbevayà tenged te mid-ulaula ta he mezaat.” Ne pilusupu is menge lalag he iring kayi. ⁶Su kenà egkehimu he kenà metazeng is Megbevayà su emun kenà sikandin metazeng, kenà egkehimu he iyan sikandin edhukum keuzemà te tivuuk he menusiya.

⁷Ne zuen daan menge pilusupu he etew he egkagi te, “Deyzey ke egkagi ki te tarù su emun egketuenan te menge etew he teruen ki, egkeisip dan he kenà mulà teruen is Megbevayà ne edeligen dan sikandin ne utew meupiya haazà. Ne emun pinaagi te menge tarù ta ebpekelepew he tutuu mulà is menge Lalag te Megbevayà, maan is edsilutan ki pa tenged te menge tarù ta?” ⁸Ne zuen menge etew he egkagi he iring kayi is ibpenurù ku, iyan, kenè ku edewaten is menge ketezengan he iring kayi su ibpesavut dan he meupiya is ked-ulaula te mezaat emun pinaagi zutun egkehimu is meupiya. Is menge etew he iring kayi is ibpenurù dan, utew metazeng is kedsiluti kandan te Megbevayà.

Wazà Minsan Sevaha he Metazeng

⁹Ne sikami is menge Hudiyu, kunaan niw vuwa ke utew key zeyzey, kenà is menge etew he kenà menge Hudiyu, iyan, kenà heini venar. Daan ku en impesavut keniyu he is tivuuk he menusiya, Hudiyu se kenà Hudiyu, ne pudu ebpekekeulaula te mezaat. ¹⁰Su zuen insurat he Lalag te Megbevayà he edhenduen te,

“Wazà minsan
 sevaha
 he etew he ed-isipen

te Megbevayà he metazeng.

11 Wazà mesayud te hustu mehitenged te Megbevayà ne wazà daan etew

he ebpen-ahà te hustu he ibayà pehendiyà te Megbevayà.

12 Su nemekesuwey zan pudu te hustu he ibayà;

mid-ulaula zan is langun te mezaat;

ne wazà minsan sevaha kandan he ed-ulaula te metazeng.

13 Utew ebpekezezaat is kebpechè dan iring te nemahù diyà te leveng he wazà bumbuni.

Teruen dan ne is egkegiyen dan, ne iring te hereg te uled su utew ibmesakit te gehinawa te menge zuma zan.

14 Utew mesakit is kebpenrawak dan.

15 Ne kenà duen dà taman su melemu zan ebpekevunù.

16 Ke minsan hendei zan ebpekepevayà, ebpekezezaat dan ne ebpekeuwit dan te kemeresayan.

17 Wazè dan metueni is melinawen he ulaula.

18 Ne kenè dan daan ed-isipen

he igkehandek dan

is kedsupak dan te Megbevayà.”

Iyan heini kes migkagi te insurat he Lalag te Megbevayà.

19 Ne netuenan ta he is ibpesavut kenita kayi te Lalag te Megbevayà, ne ibpesavut daan diyà te menge etew he nesakup te kesuguan he iyan key is menge Hudiyu. Ne pinaagi kayi egketuenan ta he wazà minsan hentei he etew he ebpekekagi he kenà sikandin dait he edsilutan su nekesupak te Megbevayà is tivuuk he menusiya. 20 Su wazà minsan hentei etawa he egkeisip te Megbevayà he metazeng pinaagi te kedtumana zin te kesuguan su layun din egkesupak is kesuguan. Umba imbegey is kesuguan su wey tew mesavut he mesinupaken kiw ves te menge sugù te Megbevayà.

Is Paagi te Kebmetazeng

21 Ne guntaan, impezayag kenitew te Megbevayà is paagi wey kiw zin meisip he metazeng. Ne kenà heini pinaagi te kedtumana te kesuguan, asal migkagi heini is paagi zutun te insurat dengan he Lalag te Megbevayà. 22 Ed-isipen kiw te Megbevayà he metazeng emun edtuuwan tew si Jesu Kristu. Is minsan hentei he etew, ne ed-isipen te Megbevayà he metazeng emun edtuuwan din si Jesu Kristu su wazà ibpelavi te Megbevayà te minsan hentei he etew. 23 Nekesalà is tivuuk he menusiya ne utew en sikandan meziyù te ketulusan he ibegey te Megbevayà. 24 Iyan, tenged dà te gagew kenitew te Megbevayà ed-isipen kiw zin gihapun he metazeng he henduen be te wazè kiw mekeulaula te mezaat su midlibri kiw ni Jesu Kristu. 25 Midsugù sikandin te Megbevayà wey

mehimu sikandin he pemuhat he elili kenitew, ne tenged te kegekpelisi kenitew te lengesa zin ebpeseyluwen te Megbevayà is minge salè tew emun edtuuwan tew sikandin. Midhimu heini te Megbevayà su wey tew mesavut he metazeng is hukum din, minsan pa zengan tenged te meinentusen sikandin, wazè din dè pa siluti is minge etew tenged te minge salè dan. ²⁶Iyan, kinahanglan he zuen silut tenged te minge salà te menusiya, umba midsilutan din si Jesus. Ne tenged dutun egketuenan tew he metazeng is kedhukum te Megbevayà ne tenged kayi egkehimu he ed-isipen din he metazeng is minsan hentei he edtuu ki Jesus.

²⁷Umba, wazà igkezantal te minsan hentei. Kenè ki ebpekekagi he iyan ketezengan ke maan is ed-isipen ki te Megbevayà he metazeng su midtuman ta is kesuguan su iyan idewata kenita te Megbevayà is kedtuu ta ki Jesus. ²⁸Tenged kayi migkagi ku en he iyan dà ketezengan ke maan is metazeng is ked-isipa kenita te Megbevayà, kenà iyan is kedtumana ta te kesuguan, kekenà, iyan is kedtuu ta ki Jesus. ²⁹Ne siguradu zuen egkagi he is Megbevayà, ne Megbevayà te minge Hudiyu zà, iyan, kenà heeyan tutuu, su iyan sikandin Megbevayà te tivuuk he menusiya, Hudiyu se kenà Hudiyu. ³⁰Su sebsevaha zà is Megbevayà ne ed-isipen din is minge Hudiyu he metazeng emun edtuuwan dan si Jesus. Ne is minge etew he kenà Hudiyu, ed-isipen din daan sikandan he metazeng emun edtuuwan dan si Jesus. ³¹Ibpesavut ku he iyan dà ketezengan ke maan is ed-isipen ki zin he metazeng is kedtuu ta, iyan, kenè niw isipa he tenged kayi wazè en pulus te minge sugù te Megbevayà su tenged te kedtuu ta ki Jesus, hustu en dutun is kegketumana ta te minge sugù din.

Is Kedtuu ni Abraham

4 ¹Penenglitan si Abraham is kepuun dey te minge Hudiyu, hengkey is netuenan din? ²Netuenan ta he kenà iyan ketezengan ke maan is mid-isip te Megbevayà sikandin he metazeng su wazè din mesupak is egkesuatan te Megbevayà. Su ke wazà supak din, tutuu iyan he zuen din igkezantal. Iyan, netuenan ta he nekesupak gihapun si Abraham ne tenged dutun wazè din iyan igkezantal ziyà te etuvangan te Megbevayà. ³Umba netuenan ta heini su zuen insurat he Lalag te Megbevayà he edhenduen te, “Midtuu si Abraham te Megbevayà ne tenged dutun te kedtuu zin, mid-isip te Megbevayà sikandin he metazeng.” ⁴Ne ke zuen etew he edsuhulan su edtumanen din is ebpeveelan kandin, haazà is suhul zin, ne wazà ivegey zà duen, kekenà, tenged te netuman din haazà is mibpeveelan kandin. ⁵Ne kenà iring dutun is ked-isipa te Megbevayà kenita he metazeng su gagew zà kenita. Umba mid-isip ki te Megbevayà he metazeng, kenà tenged te midtuman ta is mibpeveelan din kenita, kekenà, tenged dà te midtuuwan ta sikandin is ebpekehimu he mebmetazeng is minge mesinupaken. ⁶Iyan heini sikan

is impesavut dengan ni Hadì David te kegkegiya zin he utew zeyzey is etew he metazeng is ked-isipa kandin te Megbevayà su ebpeseyluwen te Megbevayà, kenà tenged te minge ulaula zin he meupiya, kekenà, tenged dà te kedtuu zin kandin. ⁷Su migkagi si Hadì David te,

“Utew zeyzey is etew he is minge kedsupak din,
ne nengepesaylu en wey is minge salè din,
ne nengelipatan en te Megbevayà!

⁸ Utew zeyzey is etew he is minge mezaat he ulaula zin,
kenè en ed-isipen te Megbevayà!”

⁹Ne heini is kegkezeyzey he migkagi ni David, wazà heini ituvad kayi zà te kenami te minge Hudiyu, kekenà, intuvad daan diyà te minge etew he kenà minge Hudiyu. Su sumalà te nekagi ku en, si Abraham, midtuu sikandin te Megbevayà ne tenged dutun te kedtuu zin mid-isip te Megbevayà sikandin he metazeng. ¹⁰Ne keenu heini meulaula? Dutun te wazè pa si Abraham mebpsirkunsidar, *he ke và dà egkegiya, te kenè pa sikandin Hudiyu, mid-isip te Megbevayà sikandin he metazeng.* ¹¹Umba mibpsirkunsidar sikandin su nehimu is kedsirkunsidar he tuus diyà te lawa zin he mid-isip te Megbevayà sikandin he metazeng tenged te kedtuu zin dutun te wazè pa sikandin sirkunsidara. Ne nehimu si Abraham he kepuun tew, *he ke và dà egkegiya, egkeiringan te langun he edtuu, minsan te wazà sikandan sirkunsidara. Umba edtuu zan su wey isipa te Megbevayà sikandan he metazeng.* ¹²Ne nehimu zaan si Abraham he kepuun, *he ke và dà egkegiya, egkeiringan te langun he minge Hudiyu he kenè dan iyan serigi is kedsirkunsidara kandan, kekenà, iyan dan serigi is kedtuu zan he iring te kedtuu ni Abraham te wazè pa sikandin sirkunsidara.*

Is Saad Pinaagi te Kedtuu

¹³Dengan dà impenaad te Megbevayà ki Abraham wey te minge kevuwazan din he iyan sikandan ebpekevayàbayà te tivuuk he menusiya. Umba impenaad heini, kenà tenged te midtuman ni Abraham is kesuguan, kekenà, tenged te midtuuwan ni Abraham is Megbevayà, ne tenged kayi te kedtuu zin mid-isip te Megbevayà sikandin he metazeng. ¹⁴Su emun iyan dà ebpekezawat kayi te impenaad te Megbevayà is etew he edtuman te kesuguan, wazè en pulus te kedtuu tew te Megbevayà, ne wazè en daan pulus te penaad te Megbevayà *su wazà minsan hentei he ebpeketuman te kesuguan.* ¹⁵Ne kenè kiw egkezeyzey pinaagi te kesuguan, su is kesuguan, ne iyan mulà igkepeuki kenitew te Megbevayà su kenè tew egketuman. Angin ke wazà kesuguan su kenà egkehimu he zuen egkesupak ta.

¹⁶Umba midhimu te Megbevayà he egkezawat tew is impenaad din pinaagi zà te kedtuu tew su wey mehimu heini pinaagi te gagew zin, ne kenà pinaagi te ed-ul-ulahan tew. Ne tenged kayi kenè en ebperis he

egkezawat tew te langun he minge kevuwazan ni Abraham is impenaad te Megbevayà. Ne kenà iyan dà ebpekezawat is minge Hudiyu he nesakup te kesuguan, kekenà, elin daan is minsan hentei he zuen din kedtuu he iring ki Abraham su nehimu si Abraham he kepuun te langun he edtuu, Hudiyu se kenà Hudiyu. ¹⁷Ne zuen insurat he Lalag te Megbevayà diyà te ki Abraham, ke sikandin te, “Ibpenaad ku kenikew he edhimuwen ku sikew he kepuun te utew mezakel he minge kelasi te minge etew.” Ne zutun mid-isip din si Abraham he kepuun tew te langun he midtuu he iring kandin. Ne is Megbevayà he iyan edtuuwan tew, ne utew sikandin mekegegehem su iyan ebpekevanhew te minge minatey, ne is minsan hengkey he wazè pa meulaula, netuenan din en he zaan iring te neulaula en. ¹⁸Si Abraham, minsan te henduen be te kenè en dutun egkehimu he egketuman is penaad kandin te Megbevayà, midtuuwan din gihapun is migkagi te Megbevayà he egkevuwad sikandin, ne nehimu iyan sikandin he kepuun te utew mezakel he minge etew. Su migkagi kandin te Megbevayà he iring kezakel is minge kevuwazan din te minge vituen diyà te langit. ¹⁹Ne zutun he timpu nenggatus en is penuigen ni Abraham, ne netuenan din he megurang en utew sikandin, ne kenè en egkehimu he egkevuwad pa sikandin. Ne netuenan din daan he kenà ebpekeanak si Sara he esawa zin su kenà si Sara ed-anak. Ne minsan pa zutun, mezesen is kedtuu zin. ²⁰Ne wazà sikandin meduwazuwa te penaad te Megbevayà, kekenà, midhemenan din is kedtuu zin ne mibpeselematan din is edhimuwen te Megbevayà. ²¹Su utew mezesen is kedsarig din he edtumanen te Megbevayà is penaad din. ²²Ne tenged dutun te kedtuu ni Abraham, insurat dengan he mid-isip te Megbevayà sikandin he metazeng. ²³Ne is insurat he lalag dengan he ebpesavut he mid-isip sikandin he metazeng, ne wazà isurat tenged dà ki Abraham, ²⁴kekenà, tenged daan kenitew wey tew mesavut he ragkes kiw zaan dutun. Sikitew, ed-isipen kiw zaan te Megbevayà he metazeng emun edtuuwan tew sikandin. Iyan sikandin sikan is mibanhew ki Jesus he Nengazen tew. ²⁵Iyan si Jesus kes midsugù te Megbevayà wey mebpehimatey te silut tenged te minge kedsupak tew. Ne zutun mibanhew sikandin te Megbevayà wey mehimu he metazeng is ked-isipa kenitew te Megbevayà he iring te wazè kiw keenu mekeulaula te mezaat.

Is Kebpeked-uliey te Meupiya he Kedepità

5 ¹Guntaan, tenged te midtuu ki en ki Jesus, mid-isip ki en te Megbevayà he metazeng he iring te wazè ki keenu mekesalà, ne tenged kayi pinaagi te mid-ulaula te Nengazen tew he si Jesu Kristu melinew en is kedepità tew te Megbevayà. ²Tenged te kedtuu tew ki Jesus midhimu zin en he megegawi kenitew is Megbevayà. Umba zekelà is kelipey ta su egkeperateng ta he keuzemà ebpekeambit ki te

utew kegkelavew te Megbevayà. ³Ne kenà duen dà taman su ebelesen te kelihey is menge kemeregenan he nengesegezan ta su netuenan ta he pinaagi kayi edlumbazen ki wey ki mehimu he meinentusen. ⁴Ne emun meinentusen ki, igkesuat heini te Megbevayà, ne emun netuenan ta he igkesuat te Megbevayà is menge ulaula ta, ne kenà ebperis he zuen meupiya he egkeperateng ta. ⁵Ne umba kenà egkehimu he kenè tew egkekuwa keuzemà is impenaad kenitew te Megbevayà su pinaagi te Wagas he Mulin-ulin he imbegey zin kenitew, egketuusan ta he ingkegagew ki te Megbevayà.

⁶Isipa nu is gagew kenita te Megbevayà. Su zutun te timpu he intelaan te Megbevayà, hein wazà minsan hengkey he egkeulaula ta he ebpekehimu he melibri ki te silut, mibpehimatey si Kristu he elili kenita te mesinupaken. ⁷Mezelag dà buwa he zuen etew he ebpehimatey he elili te minsan metazeng he etew. Egkehimu vuwa he zuen etew he ebpekevurut he ebpehimatey he elili te etew he meupiya is ulaula zin. ⁸Iyan, is Megbevayà mulà, impeehè din is gagew zin kenitew su mibpehimatey si Kristu he elili kenitew zutun te timpu zengan te kemulu kiw pa ed-ulaula te mezaat. ⁹Ne emun pinaagi te kedtigis te lengesa ni Kristu mid-isip kiw en te Megbevayà he metazeng, wey kiw pe be kenà melibri tenged ki Kristu te silut keuzemà te Megbevayà. ¹⁰Su zutun te timpu zengan he kemulu ki kuntada te Megbevayà, tenged te kebpehimatey te Anak din, nehimu ki he emigu zin. Ne emun iyan haazà, guntaan te emigu ki zin en, wey ki pe be kenà mehimu he melibri keuzemà te silut tenged te nevanhew en sikandin. ¹¹Ne kenà duen dà taman su utew zekelà is kelihey ta tenged te gagew kenita te Megbevayà he impeehè din pinaagi te Nengazen tew he si Jesu Kristu, ne pinaagi zaan kandin nehimu ki en he emigu te Megbevayà.

Is Salà wey is Gagew te Megbevayà

¹²Umba nehimu is mezaat he ulaula zini te kelibutan su pinaagi te kedsupak dengan te sevaha he etew he si Adan, ne midhimu te Megbevayà he ebpathey sikandin tenged dutun te mid-ulaula zin. Ne tenged daan dutun nekeeneb dini te kelibutan is kemetayen. Ne ebpathey is minsan hentei he etew su wazà minsan hentei he kenà ed-ulaula te mezaat. ¹³Ne minsan pa zengan te wazè pa ivegey te Megbevayà is kesuguan, mezaat en dutun is menge ulaula te menge etew, iyan, geina te wazè pa is kesuguan, wazè pa isipa te Megbevayà he edsilutan sikandan. ¹⁴Ne minsan pa zutun, puun pa te timpu ni Adan taman te timpu he zutun imbegey en is kesuguan diyà te ki Moises, egketuusan he zuen mezaat he ulaula te menge etew su mibpematey gihapun is langun he menge etew. Is ulaula zan he mezaat, ne kenà iring dutun te mid-ulaula ni Adan su midsupak din is sugù te Megbevayà, iyan, sikandan mulà,

wazè pa kesuguan he egkesupak dan. Ne si Adan, nehimu sikandin he alung te etew he ebpekeuma he iyan si Kristu.

¹⁵Iyan, kenè dan is dezuwa ebpeked-iring su is kedsupak dutun te sevaha, ne kenà iring te kebmetazeng he edhimuwen te Megbevayà. Sevaha zà he etew si Adan, iyan, tenged dutun te kedsupak din ebpmatey is tivuuk he menusiya. Ne minsan pa zutun, lavew pa he zekelà is nehimu pinaagi te gagew te Megbevayà su pinaagi te gagew te sevaha zà daan he etew he iyan si Jesu Kristu, imbegey te Megbevayà is ketazeng ne midhimu zin he metazeng is utew mezakel he menge etew. ¹⁶Ne iring din ded daan, is nehimu ni Jesus tenged te kebmetazeng he edhimuwen te Megbevayà, ne kenè man iring te nehimu te kedsupak te sevaha he etew he si Adan. Su tenged te kedsupak ni Adan te kesevaha zà, ne midhukuman is tivuuk he menusiya he edsilutan te kemetayen. Ne zutun te timpu he utew en mezakel is menge kedsupak te menge etew, impaahà te Megbevayà is gagew zin ne midhimu zin is paagi wey kiw zin meisip he metazeng he iring te wazè kiw mekesupak. ¹⁷Ne emun tenged te kedsupak dutun te sevaha zà he etew he si Adan, ebpmatey is tivuuk he menusiya, wey pe be kenà lavew pa he mekeinuinu is nehimu te sevaha zà daan he etew he si Jesu Kristu. Su is minsan hentei he edawat te zekelà he gagew kandin te Megbevayà pinaagi ki Jesu Kristu, ne ed-isipen sikandin he metazeng, ne ebegayan sikandin te untung he wazè din pidtemanan ne ebpekehadì sikandin duma te Megbevayà.

¹⁸Ne iring din ded daan, egkeehè ta he tenged te sevaha he mezaat he mid-ulaula ni Adan, nehukuman is langun he menge etew te silut, iyan, tenged te sevaha zaan he metazeng he mid-ulaula ni Jesu Kristu he iyan is kebpehimatey zin, egkehimu he ed-isipen te Megbevayà he metazeng is langun he menge etew he edtuu ne ibegey kandan is untung he wazà pidtemanan. ¹⁹Ne tenged te kedsupak te sevaha zà he etew nehimu is mezakel he mekesesalà, iyan, tenged daan te kebmetinumanen te sevaha zà he etew he si Jesus te ebpeveelan kandin te Megbevayà, egkehimu he ed-isipen te Megbevayà he metazeng is mezakel he menge etew.

²⁰Ne umba imbegey te Megbevayà is kesuguan su wey med-iseg is kegketueni te menge etew te kezekelà te kedsupaka zan kandin. Ne zutun te mid-iseg mebmezakel is menge kedsupak, impeiseg ipezekelà te Megbevayà is gagew zin te menge etew. ²¹Ne hein aney, sikitew is menusiya, kenà egkehimu he kenè ki ebpekesalà, ne tenged kayi ebpatay ki, iyan, guntaan pinaagi te ked-isipa te Megbevayà kenitew he metazeng, impeehè kenitew te Megbevayà is gagew zin su wey kiw zin mevegayi te untung he wazè din pidtemanan pinaagi ki Jesu Kristu he iyan Nengazen tew.

Minatey ki Iring ki Kristu

6 ¹Tutuu iyan he ingkegagew ki en te Megbevayà. Ne tenged kayi zuen buwa etew he ebpekekagi he meupiya ke kenè ta ed-engkezan

is ked-ulaula te mezaat su wey mekeiseg is kebpaahaa kenita te Megbevayà te gagew zin pinaagi te kebpeseyluwa zin kenita. ²Ne kenà heini egkehimu su kenà egkehimu he ebpeniguduwan ta te ed-ulaula is mezaat su wazè en kelavet kenita te mezaat he ulaula. Su iring ki te minatey he naawè en diyà te kandin is daan he untung din. ³Netuenan te en is neulaula zutun te kebewtismuwi kenita. Su nebewtismuwan ki he tuus te zuen en kebpekidsevaha ta ki Jesu Kristu ne pinaagi zutun ibpesavut daan kenita he zutun te kebpehimatey ni Jesus, henduen te iyan ki mibpatey. ⁴Su pinaagi te kebewtismuwi kenita tenged te elili ta si Jesus, nehimu he iring te iyan ki minatey wey inleveng duma kandin. Ne nehimu heini su wey mevegayi ki te vegu he untung iring te mibanhew si Kristu pinaagi te gehem te Amey tew he Megbevayà.

⁵Su emun minatey ki zuma ki Kristu tenged te elili ta sikandin, kenè en ebperis he ebegayan ki zaan te vegu he untung iring te mibegayan daan sikandin te vegu he untung hein nevanhew sikandin. ⁶Su netuenan tew he is daan he mesinupaken he kegkeetew tew, ne iring te inransang duma ki Kristu ziyà te krus su wey mebpatey. Ne tenged kayi, egkeawà is layun tew kebpekesalà ne human dutun kenè kiw en egkeuripen te ked-ulaula te mezaat. ⁷Su is minsan hentei he minatey en, ne kenè en sikandin egkeuripen te mezaat he kebayè din. ⁸Ne nesavut te en he zutun te kebpatay ni Kristu ne minatey ki zuma kandin su elili tew sikandin. Ne tenged kayi egkesavut ta zaan he egkevanhew ki zaan, ne zuen te en untung duma kandin. ⁹Netuenan tew he geina te nevanhew en si Kristu ne kenè en egkehimu he ebpatay pa maan sikandin su wazè en gehem te kemetayen diyà te kandin. ¹⁰Kesevaha zà is kebpehimatey zin he elili te langun he menge etew, ne netengkaan en haazà ne tenged kayi naawè en diyà te kandin is kegkesemuki kandin te salè tew. Ne guntaan nevanhew en, ne nehimu is untung din he igkezalig te Megbevayà. ¹¹Ne iring din ded daan, tentenuzi niw he geina te minatey ki en he zuma ki Kristu, naawè en daan dini te kenita is kegkesemuki kenita te salè ta, ne pinaagi zaan ki Jesu Kristu imbegay en kenita is begu en he untung, ne kinahanglan he igkezalig daan te Megbevayà heini is begu en he untung ta.

¹²Ne tenged kayi, menge suled, kenè te en idtugut he iyan ebayàbayà te menge lawa ta he melemu ebpatay, is mezaat he kebayè dan. Su emun idtugut ta heini, egkepezumdumahan ta is menge mezaat he suat te lawa ta. ¹³Kenè ta egemiten is minsan hengkey he vahin te lawa ta te ked-ulaula te mezaat, kekenà, idtugut ta he iyan ebayàbayà kenita is Megbevayà su zait heini kenita te nelibri en te kemetayen ne mibegayan te vegu en he untung. Ne idtugut ta he iyan egamit te lawa ta is Megbevayà wey ta meulaula is metazeng. ¹⁴Su kenè en kinahanglan he iyan ebayàbayà kenita is mezaat he kebayè ta su kenè ta iyan edserigan

is kedtumana te kesuguan, kekenà, iyan ta edserigan is kedtavang wey kegkegegawi te Megbevayà kenita.

Is Uripen te Ketazeng

¹⁵Ne kunaan buwa te zuma ke tenged te kenè en kinahanglan he tumana te pa is kesuguan, wey tenged te ingkegagew ki te Megbevayà, ne egkehimu he ebpeniguduwan te pa is ked-ulaula ta te mezaat, iyan, kenà iyan haazà egkehimu. ¹⁶Su netuenan niw he ke ebpesakup ki te minsan hentei su wey ki zin meveyveyai, egkehimu ki en he iring te uripen din. Ne iring din ded daan is etew he ebpilien din he iring te egalen din is mezaat he kebayaè din. Ne idsilut kandin is kemetayen he wazè din pidtemanana. Ne is etew mulà he ebpesakup te Megbevayà ne ed-isipen te Megbevayà he metazeng sikandin. ¹⁷Dengan iring te nengeuripen kew te mezaat he kebayaè, iyan, guntaan utew zekelà is kebpeselemati ku te Megbevayà su mibpurungan niw te edtuman is tutuu he tuluuwen he impenurù keniyu. ¹⁸Nevelukasan kew en te Megbevayà, ne nehimu kew en he menge suluguen din he metazeng en is ed-ul-ulahan niw. ¹⁹Umba insempitè ku is egkeulaula te uripen su wey melemu niw mesavut is ibpesavut ku. Su zengan iring te mibpeuripen kew te mezaat he kebayaè ne ingkesuat niw he ed-ul-ulahan te lawa niw is menge meremerik wey mezaat he ulaula he layun ed-iseg he mezaat. Iyan, guntaan kinahanglan he himuwa niw is lawa niw he metazeng he suluguen te Megbevayà wey niw metuman is egkesuatan din.

²⁰Ne zengan, hein kemulu kew pa nengeuripen te mezaat he kebayaè, wazè niw hanew te metazeng he ulaula. ²¹Ne wazà pulus he nekuwa niw te ked-ul-ulaha niw zengan te menge mahawag he guntaan utew niw en igkeeled. Su emun ebpeniguduwan te etew is iring dutun, iyan edungguan din is kemetayen he wazè din pidtemanana. ²²Iyan, guntaan, nevelukasan ki en te Megbevayà, ne nelibri ki en te kebpekeulaula ta te mezaat. Ne tenged kayi menge suluguen ki en te Megbevayà, ne utew zekelà is pulus kayi kenita su ebpeketuman ki en te egkesuatan din, ne iyan rimegas kayi te mid-ulaula te Megbevayà is kegkevegayi kenita te untung he wazà pidtemanana. ²³Ke zuen etew he ebpevayàbayà te suat te mekesesalà he lawa zin ne zuen silut kandin he iyan is kemetayen he wazè din pidtemanana. Iyan, is etew mulà he edtuuwan din si Jesu Kristu he Nengazen tew, duen ibegey kandin te Megbevayà he iyan is untung he wazè din pidtemanana.

Is Kegkelibriya Kenitew

7 ¹Menge suled, nesavut te en ke hengkey is belaud te gubirnu ne netuenan ta he zizalem ki te menge sugù te velaud taman te kenè ki pa ebpatay, ne emun ebpatay ki, kenè en egkehimu he ibpetuman pa

kenita is menge sugù te velaud. ²Penenglitan, insugù te velaud he is bahi ke zuen din esawa, kenà ebpekepeuman ebpekepeesawa emun uuyag pa haazà is esawa zin. Ne emun ebpatey haazà is esawa zin, egkehimu ke ebpeuman ebpeesawa. ³Iyan, emun wazè pa mebpatey haazà is esawa zin ne ebpekiduma wey ebpekidhulid te sengememaame en, ne nesupak din is belaud su neselselaan din haazà is esawa zin. Ne emun ebpatey is esawa zin, ebpekepeesawa ne kenè en ebpekesalà sikandin su nelibri sikandin dutun te velaud mehitenged te telteleesawa. ⁴Ne iring din ded daan, menge suled, heini is nehitavù kenitew su zutun te kebpatey ni Kristu he elili kenitew, ne mibpatey ki zaan, ne tenged kayi kenè en egkehimu he ibpetuman kenita te minatey en is menge sugù he imbilinbilin ni Moises. Ne umba nehimu heini su wey kiw mesakup ni Kristu he nevanhew en ne wey tew metuman is egkesuatan te Megbevayà. ⁵Su zengan hein kemulu tew pa edtumana is kenitew he kebayà, duen menge ulaula he indawey te kesuguan, ne tenged te indawey heini, ne nasì nehimu he iyan daan heini utew tew egkesuatan te ed-ulaula. Ne tenged te mid-ulaula tew is iring dutun, iyan dà egkepaabut tew zengan is kemetayen he wazè din pidtemanan. ⁶Ne hein nemeketuu kiw ki Jesus, nelibri kiw te Megbevayà ne wazè en kinahanglan he iyan tew pa edserigan is kedtuman te kesuguan, su zutun te kebpatey ni Jesus minatey kiw zaan ne nevelukasan kiw te kegkeuripen kenitew te salà. Ne guntaan begu en is paagi te ked-ul-ulaha tew te egkesuatan te Megbevayà su pinaagi heini te kedtavang te Wagas he Mulin-ulin, ne kenè en pinaagi te zaan he paagi he iyan is kenitew he kedtumana te insurat he kesuguan.

Is Kesuguan wey is Salà

⁷Ne kunaan te zuma ke zutun ebpuun te kesuguan is menge mezaat he ulaula! Iyan, kenà dutun ebpuun su zaan is ulaula he mezaat dini te kenita. Is kesuguan, ne iyan ebpesavut kenita ke hengkey is mezaat he ulaula. Su emun wazà izawey ziyà te kesuguan is kegkeima, ne wazè ku geina metueni he mezaat bes is kegkeima he zaan dini te gehinawa ku. ⁸Daan dini te kedì is kebpekesalà, ne hein impesavut kediey pinaagi te kesuguan he salà is kegkeima, mid-iseg is kegkeima ku ne mid-iseg daan is kebpekesalè ku. Su emun wazà kesuguan he egkesupak ta, wazà daan egketuenan ta he salà. ⁹Hein aney, wazè ku metueni ke hengkey is kesuguan, ne zutun, henduen be te wazè ku salà. Ne hein impenurù kedì is kesuguan, netuenan ku he mezaat bes is menge ulaula ku. Ne tenged kayi nesavut ku he ziyè e ves ebpekezunggù te kemetayen he wazè din pidtemanan! ¹⁰Umba nehimu is kesuguan he imbegey te Megbevayà su wey mekeangken is menge etew te untung he wazè din pidtemanan emun kenè dan edsupaken. Iyan, nehimu en he iyan idsiluti kedì is kesuguan su nesupak ku. ¹¹Henduen be te mid-ekalan a te mezaat he ulaula su

pinaagi te mezaat he ulaula ku he supak te kesuguan, human ku mesavut he nehukuman ed bes te kemetayen he wazè din pidtemanan.

¹²Is kesuguan, diyà ebpuun te Megbevayà, ne is langun he menge sugù dutun, menge sugù te Megbevayà, ne kenà haazà mezaat, kekenà, meupiya wey metazeng. ¹³Ne emun meupiya is kesuguan, kela ke ebpekekagi ki he tenged te meupiya, *he ke và dà egkegiya, tenged te kesuguan, nehukuman ad te kemetayen he wazè din pidtemanan. Ne kenà iyan haazà su tenged te mezaat he mid-ulaula ku, midhukuman ad te kemetayen su wey ikepesavut kediey he utew mezaat is kedsupaka ku te kesuguan.*

Is Kebpekedsupakà te Daan wey Begu he Kineiya

¹⁴Netuenan tew he meupiya is kesuguan su imbegey te Wagas he Mulin-ulin. Iyan, siak, geina te edtumanen ku is menge mezaat he suat te lawa ku ne nehimu a he iring te uripen te menge mezaat he kebayà. ¹⁵Ne kenè ku egkesavut ke maan is ed-ul-ulahan ku is iring kayi su is meupiya he egkesuatan ku he meulaula ku, kenè ku egkeulaula. Ne is menge mezaat he ulaula he utew ku igkeepes, ne iyan ed-ul-ulahan ku. ¹⁶Ne emun nekesupak a te kesuguan, iyan, kenè ku pezem egkesuatan he mesupak ku, ne heini is kenè ku kegkesuat, ne iyan tuus he zini te isip ku meupiya is kesuguan. ¹⁷Ne emun iyan haazà, ne kenà a iyan ed-ulaula zutun te mezaat, kekenà, iyan is daan he menge mezaat he kebayà te lawa ku ed-ulaula zutun. ¹⁸Netuenan ku he wazà minsan hengkey he meupiya he zini ebpuun te mezaat he kebayà te lawa ku, su minsan ke egkesuatan ku te ed-ulaula is meupiya, kenè ku egkeulaula. ¹⁹Su is ed-ul-ulahan ku, ne kenà iyan sikan is meupiya he egkesuatan ku, kekenà, iyan is mezaat he igkeepes ku he ed-ul-ulahan ku. ²⁰Ne emun ed-ul-ulahan ku is kenè ku pezem ed-ul-ulahan, ne kenà a iyan ed-ulaula kayi, kekenà, iyan is mezaat he kebayà te lawa ku he iyan ebpuunan dutun te mezaat he ulaula.

²¹Ne layun iring kayi is egkehitavù dini te kedì, ne emun ed-ulaula a pezem te meupiya, egkeegen a te mezaat he kebayà he zini te lawa ku. ²²Ne sumalà is egkesuatan te gehinawa ku, utew ku pezem egkesuati is kedtumana te egkesuatan te Megbevayà. ²³Iyan, dini te lawa ku, selakew is ebayàbayà kedì su edsuguen a te menge mezaat he kebayà te lawa ku he supaka ku is hustu he ulaula he egkesuatan te gehinawa ku. Uripen a te mezaat he kebayè ku, ne ebpeketuman a te suat te lawa ku. ²⁴Uteu merasey is egkeulaula ku! Hentei is ebpekevelukas kedì kayi te kegkeuripena kedì kayi te mekesesalà he lawa ku he midhukuman en te kemetayen? ²⁵Ne utew zekelà is kebpeelemati ku te Megbevayà su pinaagi te Nengazen tew he si Jesu Kristu nevelukasan e en!

Ne egkesavut niw en is egkeulaula ku. Su sakup is gehinawa ku te Megbevayà, ne is lawa ku, ne sakup mulà te mezaat he kebayè din.

Is Untung Pinaagi te Wagas he Mulin-ulin

8 ¹Ne sikita is nekidsevaha ki Jesu Kristu, kenè ki en egkehukuman te silut. ²Su pinaagi te kebpekidsevaha ta ki Jesu Kristu imbegey kenita te Wagas he Mulin-ulin is begu en he untung ne tenged kayi nelibri ki en te kebpekesalè ta he iyan edungguan din is kemetayen he wazè din pidtemanan. ³Wazà tavang he egkekuwà ta pinaagi te kedtumana ta te kesuguan geina te wazè ta mehimu te edtuman, iyan, is Megbevayà mulà, ne iyan neketavang kenita. Su midsugù din sikan is Anak din he si Jesus he nehimu he etew. Ne si Jesus, duen lawa zin he iring te lawa ta su wey zin mesegazi ziyà te lawa zin is silut te Megbevayà tenged te menge salè tew. Ne pinaagi te kedsiluti zin ki Jesus, in-awè din is gehem te mezaat he kebayè ta. ⁴Umba mid-ulaula heini te Megbevayà su wey ki meketuman te hustu sumalà is insugù te kesuguan. Ne egkehimu heini su wazè en kinahanglan he edtumanen ta is mezaat he suat te lawa ta, kekenà, ebpeketuman ki te hustu su edtevangen ki te Wagas he Mulin-ulin. ⁵Su is minsan hentei he iyan ebayàbayà kandin is mezaat he suat din, iyan din dà egkeisip is egkesuatan te menge mezaat he kebayà te lawa zin. Ne is minsan hentei mulà he iyan ebayàbayà kandin is Wagas he Mulin-ulin, iyan dekelà diyà te gehinawa zin is egkesuatan te Wagas he Mulin-ulin. ⁶Ne emun iyan ebayàbayà te isip te etew is menge mezaat he suat te lawa zin, edsilutan sikandin te kemetayen he wazè din pidtemanan. Iyan, emun iyan mulà ebayàbayà te isip din is Wagas he Mulin-ulin, wazà pidtemanan te untung din, ne melinew en is kedepitè dan te Megbevayà. ⁷Emun ebeyveyaan is isip te etew te menge mezaat he kebayà te lawa zin, kuntada sikandin te Megbevayà su kenè din edtumanen is menge sugù te Megbevayà. Ne kenà duen dà taman su kenà egkehimu he egketuman din. ⁸Is etew he ebeyveyaan te mezaat he suat te lawa zin, wazà ulaula zin he egkesuatan te Megbevayà.

⁹Ne sikita mulà, kenè ki en ebeyveyaan te mezaat he suat te lawa ta su emun dini ed-ubpà te kenita is Wagas he Mulin-ulin ebeyveyaan ki te Wagas he Mulin-ulin. Ne ke zuen etew he wazà diyà te kandin is Wagas he Mulin-ulin he midsugù ni Kristu, kenà sikandin sakup ni Kristu. ¹⁰Iyan, emun diyà te keniyu si Kristu, minsan pa te ebpatay zed is lawa niw tenged te salà, duen niw en gihapun begu he untung tenged te mid-isip kew en te Megbevayà he metazeng. ¹¹Is Megbevayà, ne iyan mibanhew ki Jesu Kristu. Ne emun dini ed-ubpà te kenita is Wagas he Mulin-ulin he midsugù din, ne ebenhawen ki zin daan pinaagi te Mulin-ulin he zini ed-ubpà te kenita.

¹²Umba, menge suled, utew kinahanglan he edtumanen ta is egkesuatan te Megbevayà ne kenè te en ebpezumdumahan is menge

mezaat he kebaya te lawa ta. ¹³Su emun kenè niw iyan ed-iniyugan is menge suat te lawa niw, edsilutan kew te kemetayen he wazè din pidtemanan, iyan, ke pinaagi te kedtawang te Wagas he Mulin-ulin egkeiniyugan niw is menge mezaat he ulaula niw, ebegayan kew te untung he wazè din pidtemanan. ¹⁴Su emun ed-egaken is minsan hentei te Wagas he Mulin-ulin tutuu en he anak sikandin te Megbevayà. ¹⁵Su is Wagas he Mulin-ulin he imbegey kenitew te Megbevayà, ne wazè kiw zin himuwa he menge uripen he utew egkengehandek te Megbevayà, kekenà, midhimu kiw zin he menge anak te Megbevayà. Ne pinaagi te gehem te Wagas he Mulin-ulin egkehimu en he egkeamey tew is Megbevayà. ¹⁶Iyan is Wagas he Mulin-ulin is ebpesavut kenitew he menge anak kiw iyan te Megbevayà. ¹⁷Ne geina te anak ki zin, keuzemà egkezawat ta is langun he meupiya he impenaad din kenita, ne kenà duen dà taman, su is minsan hengkey he ibegey zin ki Kristu, ibegey zin daan kenita. Iyan, wey ki zà ebpekeambit te utew meupiya he kebpekesavuk ni Kristu ke ed-entusen ta is menge kemeregenan tenged te kedtuu ta, iring te si Jesu Kristu, nekeantus daan te kemeregenan.

Is Ebperetengen Tew

¹⁸Ne netuenan ku he is kemeregenan he egkesegazan ta guntaan dini te kelibutan, ne wazà mekesusuluwan te utew kegelavew he ibegey kenita keuzemà. ¹⁹Ne utew meheget is kebperetenga te langun he menge linimbag te timpu keuzemà he zutun ibpaahà te Megbevayà is menge anak din he edtulusen. ²⁰Su is tivuuk he linimbag, tenged te iyan egkesuatan te Megbevayà, midhimu zengan te Megbevayà he maawà is hustu he pulus din. Iyan, ebperetengen ta is timpu keuzemà ²¹he edhimuwen te Megbevayà he wazè en kegkeredak kayi te tivuuk he linimbag, ne egkevegu is langun iring te egkevegu zaan is menge anak te Megbevayà he edtulusen. ²²Ne netuenan ta he is tivuuk he linimbag, ne iring te vahi he ebeliliten he utew edlised su puun pa zengan taman en guntaan ne utew edlised is tivuuk he linimbag tenged te meheget is kebperetenga zan te timpu he id-awà te Megbevayà is kegkezeeti zan wey kegkeredak dan. ²³Ne kenà duen dà taman, su sikita zaan is nekezawat te Wagas he Mulin-ulin he iyan tuus he zuen pa keuzemà ibegey kenita te Megbevayà, utew egkeheget is kebperetenga ta kayi. Su utew ta egkesuati he meume en haazà is timpu he zutun edhimesazen te Megbevayà is ked-anak-anak din kenita wey edtumanen din is kedtulusa zin te lawa ta. ²⁴Daan en he nelibri ki te silut, iyan, edtegegan te pa is kedtumana te Megbevayà kayi. Ne emun egkagi ki he zuen edtegegan ta, ibpesavut ta he wazè pa meulaula heini is edtegegan. Su wazà etew he edtegegan din is daan he nehitavù. ²⁵Iyan, emun wazè pa meulaula haazà is edtegegan ta, kinahanglan he edtigker ki is edtagad.

²⁶Ne elin daan baal te Wagas he Mulin-ulin is: sikita is kenà metau, edtevang an ki zin su kenè ta egketueanan is hustu he id-ampù, iyan, is Wagas he Mulin-ulin, ne iyan sikandin ebpengeetuvang te Amey tew he Megbevayà pinaagi te kedhangyù he kenà egkehimu te kinegiyan te etew. ²⁷Ne is Amey tew he Megbevayà he nesayud te menge isip tew, netueanan din ke hengkey is diyà te isip te Wagas he Mulin-ulin. Ne haazà is idhangyù te Wagas he Mulin-ulin tenged kenitew te menge anak te Megbevayà, iyan daan egkesuatan te Megbevayà te ebegey kenitew.

²⁸Sikitew is langun he mahal is Megbevayà diyà te gehinawa zin, sikitew is midhimu zin he meketuu sumalà is tuyù diyà te isip din, netueanan tew he pinaagi te minsan hengkey he egkehita vù kenitew, edtuvazan kiw zin gihapun te meupiya. ²⁹Su zengan te puunè pa te minsan hengkey, netueanan te Megbevayà ke hentei is egkehimu he menge anak din ne migkagi zin he edhimuwen din sikandan he iring te Anak din he si Jesus. Ne zutun, egkehimu si Jesus he kakey tew te utew mezakel he menge hazi zin. ³⁰Ne zutun, sikitew is langun he mibpili din wey mehimu he menge anak din, impetuu kiw zin daan. Ne kenà duen dà taman, su mid-isip kiw zin daan he metazeng he iring te wazè kiw mekesalà. Ne impenaad din daan he zuen timpu keuzemà he edtulusen kiw zin.

Is Kebmahala Kenitew ni Kristu

³¹Ne emun ed-isipen ta is langun kayi, egketueanan ta he tutuu iyan he iyan duma ta is Megbevayà ne wazà minsan hentei he ebpekekaid kenita. ³²Su minsan is Anak din he si Jesus, wazè din menuguni, kekenà, midsugù din wey mekepehimatey he elili kenita. Ne emun iyan haazà gagew zin kenita, kenà egkehimu he kenè din daan ibegey kenita is langun he impenaad din kenita. ³³Ne wazà ebpekesumbang kenita te mibpili te Megbevayà su is Megbevayà, mid-isip ki zin en he metazeng. ³⁴Ne wazà daan ebpekekagi he zait ki he edsilutan su edtevang an ki ni Jesu Kristu. Minatey sikandin he elili kenita ne kenà duen dà taman, su nevanhew en daan. Ne guntaan utew sikandin lavew su ziyà sikandin ebpinuu te zapit te egkekewanan te Megbevayà ne edtevang an ki zin diyà te etuvangan te Megbevayà. ³⁵Ne emun iyan haazà ne wazà minsan hengkey he ebpekesuwey kenita ziyà te ki Kristu. Minsan ke egkerasey ki te kemeregenan wey samuk wey pesipala; minsan ke egkeregenan ki te vitil ne wazè ta ugelingen; minsan ke egkekeizan ki ne edhimetayan ki; ne kenà egkeawà is kebmahal ta ziyà te gehinawa ni Kristu. ³⁶Su zuen insurat dengan he Lalag te Megbevayà he edhenduen te,

“Tenged te midtuuwan dey sikew,
layun key hapit edhimetayi te menge etew.
Iring key te ayam he kerehidu he in-andam te kedlepaa

su ebpespesesagad key zà ke keenu key edhimetayi.”
³⁷Ne minsan pa ke egkerasey ki kenè ki ebpetalew su ebpekevegey kenita te kelipey is ked-entusa ta kayi, ne pinaagi te gehem ni Kristu, iyan ki ebpekezaag su utew zekelà is gagew zin kenita. ^{38,39}Ne netuenan ku he wazà minsan hengkey he ebpekesuwey kenita ziyà te zekelà he gagew kenita he impaahà te Megbevayà pinaagi te Nengazen tew he si Jesu Kristu. Su minsan kayi te uuyag ki pa wey ke ebpatay ki en be, ne kenà egkeawà is gagew zin kenita. Kenà egkeawà te minge velinsuguen din wey te minge mezaat he mulin-ulin. Kenà egkeawà te minsan hengkey he egkeaula guntaan wey egkeaula keuzemà. Kenà daan egkeawà te minsan hengkey he kedesenan. Is minge kedesenan he ziyà te utew metikang wey is minge kedesenan he ziyà te utew mezalem, wey is minsan hengkey he linimbag, ne kenè dan ebpekesuwey kenita ziyà te gagew kenita te Megbevayà he ibpeehè din kenita pinaagi ki Jesu Kristu he iyan Nengazen tew.

Is Megbevayà wey is Menge Hudiyu

9 ¹Duen egkegiyen ku keniyu ne kenà tarù heini su sumusundan a ni Kristu. Ne netuenan ku zaan he kenà tarù heini su iyan eduwit te isip ku is Wagas he Mulin-ulin. ²Iyan is: utew a egkeseeng ne kenà egkeawà is kesakit te gehinawa ku tenged te minge zuma ku he minge Hudiyu he kenà edtuu ki Kristu. ³Ne ke egkehimu, egkesuatan ku pezem he iyan a edsilutan he ilis kandan ne ewaa is kebpekidsevaha ku ki Kristu su wey iyan sikandan melibri te silut. ⁴Su minge kevuwazan daan sikandan ni Israyil; mid-anak-anak sikandan dengan te Megbevayà. Ne impeehè din kandan is mekegegehem he anlag din, ne zuen minge midtukud din he paagi te kedtuvazi zin kandan, ne imbegey zin kandan is kesuguan, ne impenurù din kandan is paagi te ked-ezapa kandin. Ne mezakel pa is meupiya he penaad din kandan. ⁵Mibpili din dengan is minge kepuun dan. Ne hein mibpeetew si Kristu he iyan Megbevayà he ebayàbayà te langun, in-anak sikandin he zuma zan he Hudiyu. Berakat he zeliga sikandin te wazè din pidtemanan.

⁶Ne kenè ku iyan egkegiyen he wazà tumana te Megbevayà is penaad din kandan, kekenà, iyan egkegiyen ku he zuen duma te minge kevuwazan ni Israyil he kenà sikandan tutuu he minge sakup te Megbevayà. ⁷Is langun he egngезanan he minge kevuwazan ni Abraham, kenà daan langun te sikandan ed-isipen te Megbevayà he tutuu he minge kevuwazan ni Abraham, *he ke và dà egkegiya, kenè dan is langun ebpekezawat te impenaad te Megbevayà. Su migkagi zengan is Megbevayà diyà te ki Abraham, ke sikandin te, “Pinaagi zà ki Isaak is tutuu he kevuwazan nu.”* ⁸Ne ibpesavut kenita kayi he iring te in-anak si Isaak tenged te kedtuu ni Abraham te penaad te Megbevayà, ne egkehimu ki he

tutuu he anak te Megbevayà, kenà pinaagi te kegkevuwad ni Abraham, kekenà, pinaagi te kedsarig ta te penaad te Megbevayà. Emun edsarig ki te penaad te Megbevayà egkehimu ki he tutuu he kevuwazan ni Abraham. ⁹Su migkagi is Megbevayà diyà te ki Abraham te, “Sengetuig pa guntaan edlikuan ku sikiyu ne ed-anak dutun si Sara te maama.”

¹⁰Ne kenà duen dà taman su haazà is anak din he si Isaak, hein megurang en ne nevuwad pinaagi te esawa zin he si Rebecca te zezuwa he anak he maama he sereping he si Hakub wey si Esau. ^{11,12}Ne si Rebecca, hein megaan en ed-anak, migkegiyan sikandin te Megbevayà, ke sikandin te, “Suluguen is kakey te hazi zin.” Migkagi zin heini te wazè pa ianak haazà is sereping, ne wazè pa ulaula zan he mezaat wey meupiya. Ne umba neulaula heini su ibpesavut te Megbevayà he is kebpilia zin te menge etew, ne kenà tenged te menge meupiya he ulaula he nehimu zan, kekenà, tenged dà te iyan egkesuatan din. ¹³Ne zuen pa insurat he Lalag te Megbevayà he edhenduen te, “Mahal zini te gehinawa ku si Hakub, kenà si Esau.”

¹⁴Ne egkehimu he zuen egkagi he kenè bes metazeng is paagi te Megbevayà su zuen ibpelavi zin. Iyan, kenà iyan haazà ibpesavut ku. ¹⁵Su migkagi zengan is Megbevayà diyà te ki Moises te, “Iyan a ebayàbayà ke hentei is egkehizuwan ku wey ke hentei is ebmahalen ku zini te gehinawa ku,” ke sikandin. ¹⁶Ne egkesavut ta zutun he is tuvad te Megbevayà te menusiya, ne kenà pinaagi te kebaya te menusiya, wey menge meupiya he ulaula te menusiya, kekenà, pinaagi zà te hizu te Megbevayà. ¹⁷Iyan, emun iyan egkesuatan din egkehimu he kenè din egkehizuwan is etew, su penenglitan kes hadi dengan diyà te Ihiptu, wazà sikandin mehizuwi te Megbevayà su migkegiyan sikandin te Megbevayà te, “Umba midhimu ku sikew he hadi su wey pinaagi te kegkezaaga ku kenikew ibpeehè ku is dekelà he gehem ku ne wey mevantug a zini te tivuuk he kelibutan.” ¹⁸Ne egketuenan ta zutun he is Megbevayà, ne iyan ebayàbayà ke hentei is igkehizu zin sumalà is egkesuatan din te minsan hentei. Ne iyan daan sikandin ebayàbayà ke hentei is idtugut din he kenà ebpezumazuma kandin sumalà is egkesuatan din te minsan hentei.

Is Hizu te Megbevayà

¹⁹Ne siguradu zuen egkagi he emun iyan haazà ulaula te Megbevayà ne maan is egkepeukan din is menge etew tenged te menge salè dan te ebpekepezumazuma zè man sikandan te egkesuatan te Megbevayà. ²⁰Ne iyan egkekagi ku kayi is: ebpeketavak ki ve te Megbevayà is linimbag din dà? Egkehimu ve he ebpekeinsè ki is mibeelan te mibaal kenita te, “Maan is mibeelan a kenikew he iring kayi?” ²¹Iring te ebpendiyun su ke ediyunen din is dezuwa he kuzen, iyan sikandin ebayàbayà ke hendei zapit dutun te zezuwa is edhimuwen din he utew mekempet he ed-ehaan

su edeyzeyanan din, wey ke hendei zapit is edhimuwen din he kenà utew mekempet su kuzen dà duen.

²²Ne iring din ded daan is mid-ulaula te Megbevayà su zutun te ibpelepew zin en is rerangit din wey is mekegegehem he silut din, mid-isip din he edtigkeren din dè pà is pauk din dutun te menge etew he kinahanglan he edsilutan din. ²³Ne iyan heini mid-ulaula zin su wey sikita is egkehizuwan din, ikepesavut din kenita ke hengkey is utew meupiya he kebpekesavuk din su midtegenahan ki zin wey ki zin keuzemà metulus. ²⁴Iyan ki impetuu zin, iyan, is menge etew he impetuu zin, ne kenà menge Hudiyu zà, kekenà, elin daan is menge etew he kenà menge Hudiyu. ²⁵Su ziyà te libru he insurat ni Oseas duen Lalag te Megbevayà he edhenduen te,

“Is menge etew he kenè ku menge sakup,
edhimuwen ku he menge sakup ku.
Ne sikandan is kenà mahal zengan dini te gihinawa ku,
ebmahalen ku en guntaan.”

²⁶Ne zuen daan Lalag te Megbevayà, he edhenduen te,
“Ne heini is menge etew he kenà Hudiyu,
egkehimu he zutun te inged he migkegiyan ku sikandan he kenè dan
mengen sakup ku,
enggezanan ku sikandan gihapun he menge anak ku te wazè din
kemetayen
he Megbevayà.”

²⁷Ne zuen daan lalag ni Esaias dengan mehitenged te menge etew he kevuwazan ni Israyil, he ke sikandin te,

“Uteu zan mezakel, ne kenè en sikandan egkevilang
su iring te menge pantad diyà te veyvey te zagat,
ne minsan pa zutun,
deisey zà kandan is egkelibri te silut te Megbevayà.

²⁸Su kenà duwazuwa he egkeuma haazà is andew
he segugunà edtumanen te Megbevayà is kedlimasa zin te tivuuk he
menusiya.”

²⁹Ne iring heini te zaan he netagnà he migkagi ni Esaias he edhenduen te,

“Angin ke wazè kiw is menge Hudiyu
mehizuwi te mekegegehem he Megbevayà su wazà
minsan deisey zà he egkesamà kenitew
su midlimas kiw zin en pezem iring te menge meginged
dutun te menge inged
he Suduma wey Gumura.”

³⁰Ne iyan ibpesavut ku kayi is: is menge etew he kenà menge Hudiyu,
minsan pa te wazà metagù diyà te isip dan he egkehimu he meisip

sikandan he metazeng te Megbevayà, duen menge zuma kandan he pinaagi te kedtuu zan mid-isip sikandan gihapun he metazeng. ³¹Iyan, is menge kevuwazan ni Israyil, kunaan dan ke egkehimu sikandan he metazeng pinaagi te kedserigi zan te kedtumana te kesuguan, ne nasi wazà heini mehimu. ³²Ne maan is wazà heini mehimu? Su iyan dan midserigan is keugelingen dan he menge ulaula he meupiya ne wazè dan medtuu ki Jesu Kristu. Ne tenged kayi nehimu sikandan he iring te menge etew he nekesipà te zekelà he watu ziyà te zalan. ³³Su zuen insurat he Lalag te Megbevayà he edhenduen te,

“Duen idsavuk ku he watu ziyà te inged te menge Hudiyu he Siyun. Egkesipà heini te menge etew ne ebpekeurambak dan, iyan, ke zuen edsarig kayi te watu, kenè en ebkepeel-elezan.”

10 ¹Menge suled, utew ad egkesuat ke egkengelibri te silut te Megbevayà is menge zuma ku he Hudiyu ne iyan heini id-ampù ku layun te Megbevayà. ²Netuenan ku he utew mezesen is kedtumana zan te tuluuwen dan he kunaan dan ke egkesuatan te Megbevayà, iyan, wazè dan metueni is hustu he egkesuatan te Megbevayà. ³Su wazè dan dewata is paagi te Megbevayà te kebpeketerenga zin kandan. Ne iyan dan migamit is keugelingen dan he paagi he iyan is kedtumana te kesuguan ne wazè dan medsunud te paagi te Megbevayà te kebpeketerenga zin kandan. ⁴Su midhimu ni Kristu he wazè en pulus te kedsarig te kedtuman te kesuguan su wey is minsan hentei, pinaagi zà te kedtuu ki Kristu, ebpeketezengen sikandin te Megbevayà.

Is Kelibriyanan te Silut Para te Langun

⁵Iyan, duen insurat he lalag ni Moises mehitenged te kebpeketezenga te etew pinaagi te kedtumana te kesuguan he edhenduen te, “Is etew he iyan edserigan din is kedtumana zin te kesuguan, ne egkevegayan sikandin te untung he wazà pidtemanana emun wazà minsan hengkey he sayep dutun te kebpurungi zin kedtumana te minsan hengkey he insugù dutun te kesuguan,” ke si Moises. ⁶Iyan, mehitenged te kebpeketezenga te etew he egkehimu pinaagi te kedtuu, duen daan insurat he lalag he edhenduen te, “Kenè niw isipa he wey ki zà ed-isipa te Megbevayà he metazeng ke zuen edhendiyà te langit wey meveyai si Kristu, ⁷ne kenè niw zaan isipa he kinahanglan he zuen edhendiyà te Iveyaan su ebhawen si Kristu.” ⁸Su zuen дума pa he insurat he Lalag te Megbevayà he ebpesavut kenita he utew melemu is kebpekettu ta te Lalag te Megbevayà su is Lalag te Megbevayà, daan dini te kenita, ne egkehimu he ibpenudtul ta te zuma. Ne heini is Lalag te Megbevayà mehitenged te kedtuu ki Kristu, ne iyan daan edtudtulen dey. ⁹Ne emun edtudtulen niw ziyà te zuma he iyan en Nengazen si Jesus, ne emun

hustu is kedtuuwi niw he mibanhew sikandin te Megbevayà, egkelibri kew te silut te Megbevayà. ¹⁰Su pinaagi te isip ta ke edtuu ki ed-isipen ki te Megbevayà he metazeng, ne zutun ebpenudtulen ta ziyà te zuma is kedtuu ta ne human egkeheget is kedlibriya kenita te silut. ¹¹Su zuen insurat he Lalag te Megbevayà he edhenduen te, “Is minsan hentei he edsarig kandin, utew meupiya is edungguan din.” ¹²Su is Nengazen, wazè din ibpelavi te minsan hentei he etew, minsan ke Hudiyu wey ke kenà be Hudiyu, ne umba wazè din ibpelavi kayi su Nengazen sikandin te minsan hentei ne edtevangin din is minsan hentei he etew he ebpetavang kandin. ¹³Su zuen insurat he Lalag te Megbevayà he edhenduen te, “Is minsan hentei he ebpetavang te Nengazen, edlibriyen sikandin te silut te Megbevayà.”

¹⁴Iyan, kenà egkehimu he ebpetavang te Nengazen tew he si Jesu Kristu is menge etew he wazà meketuu kandin. Ne kenà daan egkehimu he edtuu te Nengazen is menge etew he wazè pa metudtuli mehitenged kandin. Ne kenà sikandan egkeumahan te tudtul ke wazà ebpenudtul ziyà te kandan. ¹⁵Ne wey zà egkehimu is ebpenudtul ke edsuguen sikandin te Megbevayà. Ne zuen iyan midsugù te Megbevayà su iring te migkagi ziyà te insurat he Lalag te Megbevayà he “Utwegalew is kebpekeuma te menge etew he edsangyew te Meupiya he Tudtulanen.” ¹⁶Iyan, dutun te kebpesevuta te Meupiya he Tudtulanen, mezelag dà is Hudiyu he edtuu su zuen menge lalag dengan ni Esaias diyà te Megbevayà he edhenduen te, “He Nengazen, henduen be te wazà edtuu te impesavut dey,” ke sikandin. ¹⁷Ne wey zà ebpeketuu is etew emun egkezineg din is kebpesevuta te tutuu he tuluuwen, ne is tutuu he tuluuwen, ne iyan is kebpepavut mehitenged ki Kristu.

¹⁸Ne siguradu zuen egkagi he umba ves wazà meketuu is menge Hudiyu su wazè dan mezineg heini is kebpepavut, iyan, kenà egkehimu he wazè dan mezineg, su zuen insurat he Lalag te Megbevayà he edhenduen te,

“Heini is lalag, ne nekeeneb is kebpenudtula kayi
te tivuuk he menusiya ne wazà taman te kedsengyawa kayi,” ke
sikandin.

¹⁹Ne kela ke kunaan ta ke wazà mesavut te menge kevuwanan ni Israyil is impenudtul kandan, iyan, nesavut dan en he zaan su zuen insurat he Lalag te Megbevayà dengan diyà te kandan pinaagi te lalag ni Moises he edhenduen te,

“Edhimuwen ku keuzemà he egkeima kew is menge Hudiyu te
kedtevangi ku te menge etew he kenà menge pinili ku.
Ne edhimuwen ku he egkepauk kew tenged te kegkehizuwi ku
te menge etew he zengan wazè dan metueni ke hentei a,” ke
sikandin.

²⁰Ne keladu pa utew is Lalag te Megbevayà he impenudu tul zengan ni Esaias su edhenduen te,

“Neturedu a te munge etew he kenà ebpen-ahà kedì,
ne minsan ke wazè e zan iinsà,
impesavut ku kandan ke hentei a,” ke sikandin.

²¹Ne zuen daan egkegiyen te Megbevayà pinaagi te munge lalag ni Esaias mehitenged te munge etew he kevuwazan ni Israyil he edhenduen te, “Ute w mezesen is gehinawa zan he munge etew wey utew zan mesinupaken su layun ku sikandan edhengyui he medtuu zan kedì, iyan, kenè dan ebpeming.”

Is Kebarew te Munge Hudiyu

11 ¹Ne kenè tew ed-isipen he tenged te wazà medtuu is munge etew he kevuwazan ni Israyil, mid-engkezan en te Megbevayà is tivuuk he kehudiyuwan su siak, Hudiyu a zaan iring kandan; kepuun ku si Abraham su kevuwazan a he ebpuun duen te sevaha he kevuwazan din he si Benjamin. ²Is Megbevayà, ne kenà egkehimu he ed-engkezan din is munge etew he nepilì din dengan te wazè pa limbaga is minsan hengkey. Egkesavut ta heini ziyà te insurat dengan mehitenged ki Elias su hein mid-ampù sikandin diyà te Megbevayà tenged te munge mezaat he ulaula te munge zuma zin he munge kevuwazan ni Israyil, ke sikandin diyà te Megbevayà te, ³“He Nengazen, midhimetayan dan is munge ebpeneuven nu, ne midrundus dan is munge pemuhatà he zutun ka ed-ezapa, ne iyan e zà nesamà he ed-azap kenikew ne egkesuatan e zan daan te edhimatey.” ⁴Ne midtavak kandin is Megbevayà te, “Duen pitu pa he libu he munge etew he zuma nu he kevuwazan ni Israyil he wazè dan ezapa si Baal, is kenà tutuu he megbevayà.” Iyan heini Lalag te Megbevayà ki Elias. ⁵Ne iring din ded daan guntaan su zuen pa kenà utew mezakel he munge Hudiyu he nemeketuu su iyan sikandan sikan is nengepilì te Megbevayà tenged te gagew zin kandan. ⁶Umba mibpilì din sikandan su tenged dà te gagew zin kandan ne kenà tenged te mid-ulaula zan te egkesuatan din. Ne emun suhul kandan haazà is kebpilia zin kandan tenged te munge ulaula zan he meupiya, ne kenà egkehimu he tenged te gagew zin dà mibpilì din sikandan.

⁷Ne geina te iyan haazà, egkesavut ta he is munge kevuwazan ni Israyil, ebpurungan dan pezem ebpenahaa is kegkehimu kandan he metazeng, iyan, wazà mebpulus heini ziyà te kandan. Ne minsan pa zutun, duen kenà utew mezakel he munge zuma zan he nepilì te Megbevayà ne heini mulà, midhimu en sikandan he metazeng. Ne is kezekelan, migkubalan is gehinawa zan, ne kenà ed-utengan te Lalag te Megbevayà. ⁸Su zuen insurat dengan he edhenduen te, “Midhimu te Megbevayà he mevevened is isip dan su wey zan kenà mekesavut. Ne

taman en guntaan kenè dan egketuenan ke hengkey is tutuu, ne kenè dan egkesavut is hustu.” ⁹Ne tenged te kenà kedtuu te menge Hudiyu, duen daan migkagi zengan ni David he edhenduen te,

“Berakat he tenged te menge meupiya he intuvad kandan te Megbevayà meisip dan he wazè dan salà, ne berakat he pinaagi kayi edsilutan sikandan.

¹⁰Berakat he lekapa is mata zan su wey zan mekeurambak, ne verakat daan he wazà pidtemanana te kegkevegati zan te menge seeng dan.”

¹¹Ne nekeurambak is menge zuma ku he Hudiyu pinaagi te kenè dan kedtuu ki Kristu, iyan, kenè niw isipa he kenà egkehimu te Megbevayà he mekelikù dan te kedtuu. Tenged te kenè dan kebpemineg te Lalag te Megbevayà nehimu he nengelibri te silut is menge kenà Hudiyu su wey meima is menge Hudiyu. Ne umba nehimu heini su wey likui te menge Hudiyu is kedtuu zan ke egkeehè dan he nengelibri en is kenà menge Hudiyu. ¹²Ne pinaagi te supak te menge Hudiyu he iyan is kenè dan kedtuu, midtuvazan te Megbevayà te utew meupiya is tivuuk he menusiya. Ne pinaagi zaan te naawà diyà te menge Hudiyu is kedtuvazi kandan te Megbevayà, utew zekelà is kebpaahaa te Megbevayà te menge etew he kenà Hudiyu te gagew zin. Ne emun iyan heini, wey pe be kenà utew pa zekelà is meupiya he egkezawat te menge etew he kenà menge Hudiyu zutun te timpu keuzemà ke edlikuan te menge Hudiyu is kedtuu zan.

Is Kegkelibriya te Kenà Menge Hudiyu

¹³Ne sikiyu is menge etew he kenà menge Hudiyu, duen egkegiyen ku keniyu. Siak, epustul a he mibpili te Megbevayà wey ku ikesangyew ziyen te keniyu is lalag din. Ne umba ebpurungan ku te edtuman is ebpeveelan din kediey, ¹⁴su egkesuatan ku he meima is menge zuma ku he Hudiyu pinaagi te kedtevangi ku keniyu. Su kela ke pinaagi zutun duen duma kandan he edtuu ne egkelibri te idsilut te Megbevayà. ¹⁵Su emun dutun te kedsuwayi te Megbevayà te menge Hudiyu, nehimu he nekidsevaha is Megbevayà te menge kenà Hudiyu, ne wey pe be kenà lavew pa he utew meupiya is idtuvad dutun te menge kenà Hudiyu ke ebpekid-uliey en maan is Megbevayà diyà te menge Hudiyu. Utew meupiya is egkeulaula zutun su zutun he timpu iring is tivuuk he menusiya te minatey he nevanhew en!

¹⁶Ne geina te negaked te Megbevayà si Abraham, si Isaak, wey si Hakub, is menge kepuun te menge Hudiyu, kenà egkehimu he kenà daan gaked te Megbevayà is menge kevuwazan dan. Emun gaked te Megbevayà is dalid te kayu, kinahanglan he gaked din daan is lawa. ¹⁷Is menge kevuwazan ni Israyil, ne iring sikandan te kayu he ulivu he ed-eliminahan

te Megbevayà. Ne zuen minge subpang dutun te kayu he midtamped te Megbevayà. Ne sikiyu is kenà minge Hudiyu, ne iring kew te minge subpang te wazà ipemula he ulivu he in-ilis te Megbevayà he impetuvù din dutun te midtempezan din te subpang. Ne iring ded daan guntaan utew meupiya is kedtuvazi keniyu te Megbevayà, iring te meupiya zaan is kedtuvazi zin dengan te minge Hudiyu. ¹⁸Ne kinahanglan he kenè niw isipa he lavew kew kenà is minge Hudiyu su minge subpang kew zà daan ne is sustansya te subpang, ne ziyà ebpuun te lawa te kayu ne kenà ebpuun diyà te minge subpang is sustansya te lawa.

¹⁹Ne egkehimu he zuen egkagi te, “Sikami is kenà minge Hudiyu, iyan key lavew su iyan key in-ilis te Megbevayà te minge Hudiyu.” ²⁰Ne venar iyan he iyan kew in-ilis, iyan, umba in-awà is minge Hudiyu te Megbevayà su wazè dan medtuu. Ne umba in-ilis kew kandan su midtuu kew mulà. Ne minsan pa te iyan heini, kenè niw isipa he iyan kew lavew, kekenà, tegtegami niw is minge ulaula niw. ²¹Su emun midtamped te Megbevayà is minge tutuu he minge subpang, *he ke và dà egkegiya, is minge Hudiyu, iyan kew pe be kenè din daan tempeza is subpang te wazà ipemula he ulivu ke kenè kew is kenà minge Hudiyu edtuu.* ²²Ne pinaagi kayi egkesavut ta is gagew te Megbevayà wey ke maan is edsilut sikandin. Midsilutan din is wazà mebpemineg, iyan, igkehizu kew zin ke edhemenan niw is gagew zin, su emun kenà, ne id-awè kew zin daan. ²³Ne is minge Hudiyu, emun ed-engkezan dan is kenè dan kedtuu kandin, idlikù sikandan te Megbevayà duen te zaan he ebpuunan dan dutun te puun te kayu su egkehimu zin is kedlikua zin kandan. ²⁴Ne sikiyu is kenà minge Hudiyu, kenè kew tutuu he minge subpang dutun te kayu su ziyè kew ebpuun te kayu he kenà pinemula, ne midhimu kew zin he subpang dutun te kayu he ed-eliminahan din. Ne emun egkehimu heini keniyu te ebpuun te kayu he kenà pinemula, wey pe be kenè din egkehimu he idlikù din sikan is tutuu he minge subpang dutun te zaan he ebpuunan dan.

Is Hizu te Megbevayà te Kemenmenusiyaan

²⁵Egkesuatan ku, minge suled, he mesavut niw is ed-ul-olahan te Megbevayà he zengan wazà mesavut te menusiya. Umba ibpesavut ku heini keniyu su wey kenè niw isipa he iyan kew lavew kenà is minge Hudiyu. Ne minsan pa te intugut te Megbevayà te zuma he minge Hudiyu is kenè dan kedtuu, duen timpu keuzemà he ed-engkezan dan is kenè dan kedtuu te Megbevayà su taman dà heini zutun te timpu he egkeamin ebpeketuu is langun he kenà minge Hudiyu he imbanglis te Megbevayà kandan is kebpeketuu zan. ²⁶Ne zutun egkeamin egkelibri te silut is langun he minge kevuwazan ni Israyil su zuen insurat he Lalag te Megbevayà he edhenduen te,

“Duen Menluluwas he ziyà ebpuun te minge Hudiyu ne pinaagi kandin ed-engkezan te langun he minge kevuwazan ni Hakub is kenè dan ked-azap kediey te Megbevayà.

27 Ne zutun te ked-ewaa ku

te minge ulaula zan he mezaat,

human egketuman is penaad ku zengan kandan,” ke sikandin.

28 Ne is duma he minge Hudiyu, ne nehimu sikandan he minge kuntada te Megbevayà tenged te wazè dan medtuu te Meupiya he Tudtulanen. Ne tenged dutun nehimu he iyan kew is kenà minge Hudiyu, nelibri te silut. Ne minsan pa zutun, kemulu pa mahal ziyà te gehinawa te Megbevayà is minge Hudiyu tenged te pinilì din sikandan wey tenged te minge penaad din dengan diyà te minge kepuun dan. 29 Su kenà egkehalinhalin is ed-isipen te Megbevayà, kekenà, is ebpilien din he minge etew, ne iyan daan edtuvazan din te meupiya. 30 Ne sikiyu zaan is kenà minge Hudiyu, dengan wazè kew mebpemineg te Megbevayà, iyan, guntaan nehizuwan kew zin tenged te kenà guntaan kebpemineg te minge Hudiyu. 31 Ne iring din ded daan diyà te kandan, su minsan pa te kenè dan guntaan ebpemineg, egkehimu he iring te kegkehizuwi wey kebpeseyluwa keniyu te Megbevayà, egkehizuwan din daan sikandan keuzemà. 32 Su is Megbevayà, ne impeehè din he mesinupaken wey zait he edsilutan is minsan hentei he menusiya. Impeehè din heini su wey, pinaagi kayi, mehimu zaan he egkehizuwan din sikandan is langun.

Is Kegkemekegegehèm te Megbevayà

33 Utew zekelà is gagew te Megbevayà; kenà egketegkad is ketau zin wey kedsavut din. Kenà egkesavut te etew is minge ulaula zin ne kenà egkeseysey te minsan hentei is ed-ul-ulahan din. 34 Su zuen insurat he Lagag te Megbevayà he edhenduen te,

“Wazà ebpeketegkad te ed-isipen te Megbevayà ne kenà daan kinahanglan he zuen edsambag kandin.

35 Wazà kurang din te minsan hengkey, ne kenà egkehimu he zuen ibegey tew kandin he egkehimu he egkeutang din kenitew.”

36 Iyan sikandin sikan is nenlimbag te minsan hengkey; ne iyan sikandin ed-uwit te minsan hengkey he linimbag, ne pinaagi zaan te minsan hengkey he linimbag edeligen sikandin. Berakat he zeliga is Megbevayà te wazè pidtemanan.

Is Dait he Ebeelan te Minge Tumutuu

12 1 Na, minge suled, tenged te utew zekelà he hizu kenitew te Megbevayà, edhengyuan ku sikiyu he ipeveyveyai niw kandin is lawa niw wey gehinawa niw. Iyan heini ibpemuhat he kenà edhimetayan, ne kinahanglan he wazà igkesawey zuen su wey mesuati te Megbevayà.

Ne iyan heini hustu he ked-ezapa niw kandin. ²Kenè niw iringi is menge ulaula te menge etew he kuntada te Megbevayà, kekenà, itugut niw he helina kew te Megbevayà pinaagi te kebeguwa zin te isip niw. Ne zutun egkesavut niw human is egkesuatan te Megbevayà, he ke vâ dà egkegiya, egkesavut niw ke hengkey is menge ulaula he metazeng he egkesuatan he kenà egkesewayan te Megbevayà.

³Ne tenced te imbegey kedì te Megbevayà is kegehem te kedsengyawa te lalag din, egkegiyen ku keniyu te langun he kinahanglan he kenè niw isipa he lavew kew te menge zuma niw, kekenà, kinahanglan he hustu is ked-isipa niw te ketau niw sumalà is kedtuu he imbegey te Megbevayà diyà te kada sevaha keniyu. ⁴Su is kada sevaha kenitew ne zuen din lawa, ne is menge parti kayi, ne kenà ed-iiring-iring is baal te kada sevaha. ⁵Ne iring din ded daan, sikitew is menge tumutuu ki Kristu, ne nehimu kiw he iring te lawa zin, ne iyan kiw menge parti zutun. Neubpu is kada sevaha he parti te menge zuma zin he parti. ⁶Ne zuen ketau he imbegey te Megbevayà diyà te kada sevaha he parti, asal, kenà ebpeked-iiring haazà is ketau te kada sevaha. Kinahanglan he egemiten ta is ketau he imbegey kenita. Ne penenglitan ke imbegey ziyà te sevaha is ketau te kebpesevuta te Lalag te Megbevayà ne kinahanglan he mekeikul heini te tuluuwen he midtuuwan ta. ⁷Ne emun iyan imbegey kenita is ketau te kedtavang te menge zuma ta, kinahanglan he ebpeniguduwan ta is kedtavang. Ne emun duen ketau ta te kebpenurù te Lalag te Megbevayà, ne ebpurungan ta is kebpenurù ta. ⁸Ne emun iyan imbegey kenita is ketau te kedhegeta te kedtuu te menge zuma ta ne iyan heini ed-ul-ulahan ta. Ne emun iyan imbegey kenita is ketulanged ta te kedtavang te menge etew he egkengeayuayu, ne kinahanglan he edtulanged ki te kedtavang kandan. Ne emun iyan imbegey kenita is kedumelaha te menge tumutuu ne kinahanglan he ebpurungan ta is kedumala ta. Ne emun iyan imbegey kenita is kedtavang te menge etew he edlised ne kinahanglan he kenà pinaagi te ked-usur is ked-ul-ulaha ta kayi.

⁹Kinahanglan he kenà tarù is kegkegegawi ta te menge zuma ta. Kinahanglan he utew ta igkeepes is mezaat he ulaula. Edhemenan ta is meupiya he ulaula. ¹⁰Sikitew is midsusuled pinaagi ki Kristu, ibpeehè tew he mahal zini te gehinawa tew is kada sevaha kenitew, ne ibmeupiya te gehinawa tew is kedtahud tew te menge zuma tew. ¹¹Kenè kiw ebpepepegul, kekenà, edhegeten tew ziyà te gehinawa tew is kedtumana tew te menge sugù te Megbevayà. ¹²Kinahanglan he layun kiw edlipey su zuen utew meupiya he egkezawat tew keuzemà. Ed-entusen tew is menge kemeregenan ne layun kiw ed-ampù diyà te Megbevayà. ¹³Ebegayan tew te tavang is menge suled tew he egkengeayuayu. Ne ibpepemenahik ta ziyà te valey ta is etew he humuhulevungà.

¹⁴Is ebpesipala kenita, id-ampù ta ziyà te Megbevayà he tuvazi zin. Ne kenè ta iyan id-ampù he siluti zin. ¹⁵Ke zuen etew he zuen din igkelipey,

melipey kew zaan tenged dutun te kelipey zin. Ne ke zuen etew he zuen igkeseeng din, keseeng kew zaan tenged dutun te igkeseeng din. ¹⁶Kinahanglan he mesevaha is gehinawa niw te minge tumutuu. Kenè kew mebmepelevawen, kekenà, mebpekiduma kew te minge etew he minus is pid-etawan dan. Ne kenè niw isipa he uluwanen kew kenà sikandan.

¹⁷Ke zuen ebpesipala keniyu kenè kew mebales. Peniguduwi niw te ed-ulaula is minge ulaula he kenà egkesewayan te minsan hentei. ¹⁸Himuwa niw is taman te egkehimu niw su wey melinawen is kebpekesavuk niw, ne wazà igkepeuki keniyu te minsan hentei. ¹⁹Kenè niw, minge minahal ku he suled, velesi is etew he ed-ulaula te mezaat diyà te keniyu, kekenà, pesegdana niw he iyan edsilut is Megbevayà su zuen insurat he Lalag te Megbevayà he edhenduen te, “Iyan a ebales; iyan a edsilut.” ²⁰Iyan ed-ul-ulahan ta is sambag te insurat he Lalag te Megbevayà he edhenduen te, “Emun egkevital is kuntada nu, ipekaan nu. Emun egkemezahan, ipeinum. Su emun iyan heini ed-ul-ulahan nu, utew sikandin egkeeled tenged te pesipala zin kenikew.” ²¹Minsan ke utew mezaat is pesipala kenita kenè ta ebelesan te mezaat su emun ebelesan ta, egkezaag ki su egkeuwit ki te mezaat. Iyan ed-ul-ulahan ta is meupiya he vales ne tenged kayi iyan egkezaag is kuntada ta su egkeuwit sikandin te meupiya.

Is Kebpezumazuma te Gubirnu

13 ¹Ne kinahanglan he edtuman kiw te velaud te gubirnu is minsan hentei kenitew. Su wazà ebpemunuan te inged he wazà itugut te Megbevayà he mekepemunuan wey wazà gubirnu he wazà tukuza te Megbevayà. ²Ne is minge etew he edsukul te gubirnu, ne iyan edsukulan dan is midtukud te Megbevayà ne tenged dutun edsilutan sikandan te Megbevayà. ³Su wazà kinahanglan he egkehandek ki te ebpemunuan kenita ke meupiya is minge ulaula ta; wey ki zà egkehandek ke ebaal ki te mezaat. Emun egkesuat kew he kenè kew mahandek te minge ebpemunuan ne ul-ulaha niw is meupiya he ulaula ne edeligen kew zan. ⁴Ne haazà is etew he ed-uwit te velaud, ne suluguen sikandin te Megbevayà su wey mebmeupiya is kebpekesavuk tew. Ne emun mezaat is ulaula tew ne hustu iyan he igkehandek tew su egkehimu he mevegat is idsilut din. Suluguen sikandin te Megbevayà ne edtumanen din is egkesuatan te Megbevayà ke edsilutan din is minge mesinupaken. ⁵Tumana niw is minge sugù te gubirnu, kenà tenged dà te egkehandek kew te silut te Megbevayà, kekenà, tenged te netuenan niw he iyan heini hustu he ed-ul-ulahan.

⁶Ne iyan daan heini ketezengan ke maan is ebayad ki te vuhis, su is minge upisyal, ne iring te iyan egalen dan is Megbevayà ke hustu is kedtumana zan te ebpevelan kandan. ⁷Ne tenged kayi kinahanglan he

ebeyazan ta is buhis wey is duma pa he ebpeveyazan kenita te gubirnu. Ne edtehuzen ta zaan is minge etew te gubirnu, ne ibpeehè ta is dekelà he kedtehuza ta te pid-etawan dan.

Is Dait te Kerayag

⁸Kenè niw pekелugeyaza is kebeyazi niw te minge utang niw ziyà te minsan hentei, kekenà, iyan niw pekелugeyaza te wazè din en taman is kebmahala niw ziyà te gehinawa niw te minge zuma niw, su is etew he ebmahalen din is minge zuma zin, ne netuman din en is minge sugù te Megbevayà. ⁹Su zuen insurat dutun te kesuguan he edhenduen te, “Kenè niw selselai is esawa niw; ne kenè kew pemumunù; ne kenè kew penakew; ne kenè niw isipa he egkesuatan niw is azen te zuma he etew.” Ne heini is minge sugù wey is duma pa, ne egketuman ta heini is langun ke edtumanen ta is sugù he edhenduen te, “Kinahanglan he mahala nu is duma nu ziyà te gehinawa nu; irepeng nu sikandin te kenikew he gehinawa.” ¹⁰Su emun ebmahalen ta is duma ta ne kenà egkehimu he ebpesipelahan ta sikandin, ne netuman te en heini is tivuuk he kesuguan.

¹¹Kinahanglan he iyan heini ed-ul-ulahan ta su netuenan ta ke hengkey is hustu he ed-ul-ulahan kayi te timpu. Su puun guntaan, is timpu keuzemà he zutun edhimesazen te Megbevayà is kedlibriya zin kenitew, uvey en kenà dutun te timpu zengan he neketuu kiw. Ne tenged kayi kinahanglan he kenè kiw iring te etew he nekelipezeng, kekenà, iring te etew he ed-andam. ¹²Su zini te kelibutan, iring te utew merusirem tenged te mezaat he ulaula, iyan, megaan en egketapus is kezukileman su megaan en egkepawà, he ke vâ dà egkegiya, megaan en edlikù si Kristu. Ne tenged kayi, ed-engkezan tew en is minge mezaat he ulaula he zait te kezukileman ne idsun-ud tew is limbutung he iyan is kerayag, he ke vâ dà egkegiya, ed-ul-ulahan tew is meupiya he ulaula. ¹³Ed-ul-ulahan tew is hustu su iyan heini ulaula he zait te minge etew he neteyawan te Megbevayà. Kenè ki en edtampu te ketiguman te ebpemelelangut ne kenè ta egkevuten is kenè ta esawa. Kenè ki ebpekid-egèt wey kenè ki egkesina. ¹⁴Ne idsun-ud ta is Nengazen tew he si Jesu Kristu, *he ke vâ dà egkegiya, ed-ul-ulahan ta is ulaula zin. Ne kenè te en maan ed-isipen is kedtumana te minge mezaat he kebaya te lawa ta.*

Is Kedhukum

14 ¹Ne ke zuen duma niw he edtuu ki Kristu, iyan, kenè pa meheget is kedtuu zin, dewata niw sikandin, iyan, kenè kew mebpekidlewanà kandin ke is ulaula zin tenged te kedtuu zin, ne kenà utew ebpekeiring te keniyu. ²Is etew he meheget en is kedtuu zin, ne iyan ed-isipen din is: egkehimu ke egkeenen ta is minsan hengkey he egkeenen, iyan, is etew he kenè pa meheget is kandin he kedtuu, ne kunaan din ke wazà itugut kenitew

is kegkaan te minsan hengkey he usa, ne minge lumbey zà is idsezè din. ³Ne is etew he egkeenen din is minsan hengkey, kinahanglan he kenè din isipa he lavew sikandin te etew he minge lumbey zà is idsezè din. Ne iring din ded daan su is etew he minge lumbey zà is idsezè din, ne kinahanglan he kenè din isipa he lavew sikandin te etew he egkaan te minsan hengkey, su midawat sikandan pudu te Megbevayà. ⁴Kenà egkehimu he edsusiyen ta is minge ulaula te suluguen te sengeetew en su haazà is egalen din, iyan edsusi kandin ke netuman din en be is ebpevelan kandin wey ke wazà. Ne iring din ded daan, kenà egkehimu he edsusiyen ta is minge ulaula te zuma ta he tumutuu su iyan edsusi kandin is Megbevayà. Siguradu he egketuman din is ebpevelan kandin te Megbevayà su edtavang kandin is Megbevayà.

⁵Ne iring din ded daan, ed-isipen te sevaha he etew he zuen minge andew he utew mahal ziyà te Megbevayà, ne ed-isipen daan te sevaha pa maan he wazà ibpelavi te Megbevayà te minsan hengkey he andew. Kinahanglan he mevenari is kada sevaha he is egkeisip din wey ed-ul-ulahan din, ne iyan hustu he ed-ul-ulahan. ⁶Su is etew he egkeisip din he utew mahal is sevaha he andew, ne umba egkeisip din is iring dutun su wey mesuat is Megbevayà. Ne iring din ded daan is etew he egkaan te minsan hengkey, umba egkeenen din su egkeisip din he iyan haazà egkesuatan te Megbevayà ne egkepeselematan din haazà te Megbevayà. Ne is etew he minge lumbey zà is idsezè din, ne umba iyan dà haazà idsezè din su egkeisip din he iyan haazà egkesuatan te Megbevayà ne egkepeselematan din daan haazà te Megbevayà. ⁷Su wazà minsan sevaha kenitew te minge tumutuu he kenà layun gaked te Megbevayà ke zini ki pa te kelibutan wey ke minatey ki en be. ⁸Su emun uuyag ki pa ne sakup ki te Megbevayà, ne emun ebpatay ki ne iring din ded daan. Ne umba, ke uuyag ki pa wey ke minatey ki en be, gaked ki gihapun te Megbevayà. ⁹Su umba mibpehimatey si Kristu wey nevanhew sikandin su wey mekevayàbayà sikandin te minge tumutuu kandin he uuyag pa wey minatey en. ¹⁰Ne geina te iyan heini, kenà meupiya ke iyan ki edsawey te minge ulaula te minge suled ta te kedtuu wey ke egkeminusan ki kandan su keuzemà sikitew is langun, ebpekeetuvang te Megbevayà ne iyan sikandin edsusi kenitew te langun. ¹¹Su zuen insurat he Lalag te Megbevayà, ne zutun migkagi is Nengazen te,

“Iyan a wazè din kemetayen he Megbevayà
ne tenged kayi tutuu iyan he edluhuzan a te tivuuk he menusiya,
ne ebpekeazap kediey is langun.”

¹²Ne zutun diyè kiw ebpekeetuvang te Megbevayà su edsusiyen kiw zin ne egkekagi ta kandin is langun he mid-ulaula ta zini te kelibutan.

Is Ebpekezezaat te Isip

¹³Ne tenged dutun, minge suled, ed-engkezan te en is kedsawey ta te minge ulaula te minge zuma ta he tumutuu. Su kinahanglan he ed-ahaan

ta is kenita he minge ulaula su wey wazà minsan hengkey he ulaula ta he ibpekesalà te minge zuma ta. ¹⁴Tenged te kebpekidevaha ku te Nengazen tew he si Jesus, impesavut kedi he wazà minsan hengkey he egkeenen he idawey te Megbevayà. Iyan, ke zuen etew he edtuuwan din he indawey te Megbevayà is sevaha he egkeenen ne kenà meupiya ke egkeenen din. ¹⁵Ne emun egkeenen niw haazà is kunaan din ke indawey, utew ibmesakit haazà te gehinawa zin ne iring te wazè kew megegawi. Ne kenà meupiya, emun egkepenulayan haazà is etew pinaagi te kegkaan niw zutun su zuma niw man he tumutuu ne mibpehimatey si Kristu he elili zaan kandin. ¹⁶Ne ke zuen ulaula he egkeisip te zuma he tumutuu he indawey te Megbevayà, iyan, netuenan niw he wazà izawey te Megbevayà haazà is ulaula, kenè niw ul-ulaha su wey kenà ebpekekagi is minsan hentei he mezaat is mid-ulaula niw. ¹⁷Su is kedhedii kenita te Megbevayà, ne kenà pinaagi te kedtumana ta te minge sugù mehitenged te minge keenen wey inumen he idawey, kekenà, pinaagi te kebpeketezenga kenita te Megbevayà he metazeng wey pinaagi te melinawen he kebpekidepitè ta te minge zuma ta, wey pinaagi zaan te kelipey he ibegey te Wagas he Mulin-ulin. ¹⁸Ne ke pinaagi kayi edsundanan ta si Kristu, igkesuat ki utew te Megbevayà, ne egkesuatan daan te minge etew is minge ulaula ta.

¹⁹Umba ebpurungan ta is minge ulaula ta su wey kenà maawà is melinawen he kebpekidepitè ta te minge zuma ta ne wey zaan meheget is kedtuu te kada sevaha kenitew. ²⁰Ne kenè niw zèdeeti is ed-ul-ulahan te Megbevayà pinaagi te kegkaan niw te egkeenen he kunaan te zuma ke indawey kenita. Egkehimu ke egkaan ki te minsan hengkey he egkeenen, iyan, emun iyan ibpekesalà te zuma is kegkaan ta ne kenà haazà meupiya. ²¹Ne iyan meupiya he ulaula is kenè ki egkaan te egkeenen he kunaan te zuma ke indawey, ne kenè ki ed-inum te vinu, wey kenè ta ed-ul-ulahan is minsan hengkey emun pinaagi zutun egkepenulayan is minsan hentei. ²²Ne ke minsan hendei zapit is edtuuwan niw mehitenged kayi kenè niw petueni te minge zuma niw su iyan ebayàbayà keniyu is Megbevayà. Utey zeyzey is etew he kenà egkesewayan te gehinawa zin is minge ulaula zin. ²³Ne ke zuen etew he egkevahinbahin is gehinawa zin su wazè din metueni ke supak is kegkaan din wey ke kenà, ne emun egkeenen din haazà is kunaan din ke indawey ne ebpekesalà sikandin te Megbevayà su edsupaken din is netagù diyà te gehinawa zin. Emun ed-ul-ulahan ta is midtuuwan ta he kenà meupiya, ne ebpekesalè ki.

Is Egkesuatan te Zuma he Etey

15 ¹Ne sikitew is meheget is kedtuu te Megbevayà, kinahanglan he ed-entusen ta is kenè ta ked-ul-ulaha te ulaula he ibpekesalà te minge zuma ta he kenè pa meheget is kedtuu zan. Ne kenè ta iyan

idtegel is kenita he egkesuatan, ²kekenà, iyan ta eppen-ahaan is igkesuat te zuma ta su wey meheget is kedtuu zin. ³Su si Kristu, wazè din isipa is kandin he egkesuatan su insurat dengan is midtagnà he menge lalag din diyà te Megbevayà he edhenduen te, “Is menge mezaat he lalag te menge etew he insulè dan kenikew, ne iyan daan kedsulaa zan kediey.” ⁴Su is minsan hengkey he insurat dengan he Lalag te Megbevayà, ne umba impesurat din su wey kiw mepenurù. Su pinaagi te Lalag te Megbevayà ibpenurù kenitew is kebmeinentusen te kemeregenan wey edsembagan kiw su wey kenà maawà is kebpeebuta tew te meupiya he egkeulaula keuzemà. ⁵Is Megbevayà, ne iyan edsambag kenitew wey ebegey kenitew te kebmeinentusen te kemeresayan. Berakat he himuwa zin he mesevaha is gehinawa niw wey isip niw kayi te kedsundani niw ki Jesu Kristu. ⁶Ne emun iyan haazà ne human egkesevaha is kedalig niw te Megbevayà tew wey Amey te Nengazen tew he si Jesu Kristu.

Is Kedtuu te Kenà Menge Hudiyu

⁷Is menge zuma niw he tumutuu, ne zewata niw he iring te menge tempezè niw en te pused niw su midawat kew zaan ni Kristu he iring te tempezè din en te pused. Ne emun ed-ul-ulahan niw heini egkezalig is Megbevayà. ⁸Benar is egkegiyen ku he si Kristu, nehimu sikandin he iring te suluguen te menge Hudiyu su wey zin ikepaahà kandan he tutuu iyan he edtumanen te Megbevayà is menge penaad din dengan diyà te menge kepuun dan. ⁹Ne elin daan ketezengan ke maan is neulaula heini su wey sikiyu is kenà menge Hudiyu, mehizuwi kew zaan te Megbevayà ne tenged kayi ebpekezalig kew zaan kandin. Su zuen insurat he lalag ni Kristu ziyà te Megbevayà he edhenduen te,

“Siak wey is menge etew he kenà menge Hudiyu,
utew zekelà is kebpeselemati zey kenikew ne egkentahan ku is
kedalig kenikew.”

¹⁰Ne zuen pa egkeehè ta ziyà te insurat he Lalag te Megbevayà he edhenduen te,

“Sikiyu is menge etew he kenà menge Hudiyu,
tampu kew te kelipey su iring kew en te menge Hudiyu,
sikan is daan he nengepili te Megbevayà.”

¹¹Ne zuen pa zaan edhenduen te,

“Sikiyu is langun he menge etew he kenà menge Hudiyu,
deliga niw is Nengazen;
ne sikiyu is tivuuk he menusiya,
deliga niw sikandin.”

¹²Ne zuen pa migkagi zengan ni Esaias he egkevasa ta, ke sikandin te,
“Duen ebpekeuma he kevuwazan ni Isai
ne iyan sikandin edhadì te menge etew he kenà menge Hudiyu.

Ne iyan sikandin edserigan dan,” ke sikandin.

¹³Is Megbevayà he iyan puunà te langun he meupiya he ebpeebuten tew, berakat he vegayi kew zin te utew zekelà he kelipey wey melinawen he kebpekesavuk tenged te kedtuu niw kandin su wey pinaagi te gehem te Wagas he Mulin-ulin meheget is kebpeebuta niw te langun he meupiya he egkezawat niw keuzemà.

Si Pablo Sugù Diyà te Kenà Menge Hudiyu

¹⁴Menge suled, netuenan ku en he layun meupiya is menge ulaula niw, ne netuenan ku zaan he nepurung niw en mesavut is Lalag te Megbevayà, ne egkehimu en he ebpekepenurù kew te zuma. ¹⁵Ne minsan pa te iyan heini, kayi te surat ku kenà a egkelenew he edsambag keniyu su zuen mezakel he impenurù keniyu he kenè ku egkesuatan he melipati niw. Umba kenà a egkelenew su mibegayan a te Megbevayà te kegehem ¹⁶wey a mehimu he sugù ni Jesu Kristu ziyàn te keniyu te menge etew he kenà menge Hudiyu. Henduen te memumuhat a su ke pinaagi kedì ebpeketuu is menge etew; egkehimu zan he iring te pemuhat ku he pinaagi te kedlumpiyuwi kandan te Wagas he Mulin-ulin edewaten te Megbevayà. ¹⁷Ne tenged te kedtevangi kediey ni Jesu Kristu kenà a egkeeled te kebpenudtul kayi te langun he nehimu ku te suluguen te Megbevayà. ¹⁸Asal iyan dà igkepenudtul ku is nehimu ni Kristu pinaagi kediey. Su pinaagi kedì duen menge etew he kenà menge Hudiyu he edtumanen dan en is menge sugù te Megbevayà. Nehimu heini pinaagi te impepenudtul kedì, pinaagi te impeulaula kedì, ¹⁹pinaagi te menge singyal wey egkein-inuwan wey pinaagi zaan te gehem te Wagas he Mulin-ulin. Midhipanew a puun diyà te inged he Hiruselim pehendiyà te inged he Iliriku ne mibpurungan ku te ebpesavut is Meupiya he Tudtulanen te keagi ni Kristu. ²⁰Ne egkesuatan ku layun he mepenudtul ku is Meupiya he Tudtulanen diyà te menge inged he wazè pa zutun mezineg is ngazan ni Kristu. Umba ed-ul-ulahan ku heini su wey ku kenà mesublì te ebpenudtul te Meupiya he Tudtulanen is menge etew he netudtulan en te zuma. ²¹Su netuman ku is insurat he Lalag te Megbevayà he edhenduen te,

“Haazà is wazè pa mekezineg te ngazan din, egketuenan dan gihapun ke hentei sikandin. Ne is wazè pa metudtuli, duen timpu he human dan ebpekesavut.”

Is Suat ni Pablo te Kedhendiyà te Ruma

²²Ne tenged kayi te langun he menge vaal ku te ebpenudtul zutun te menge inged, nesanggan a is edhendiyàn te keniyu. ²³Ne guntaan te netapus ku en is baal ku kayi te menge inged, wey geina te neuget en utew is ked-isipa ku he edhendiyàn a, ²⁴egkeisip ku he guntaan human

e en ebpekehendiyan te keniyu. Egkesuatan ku he mekehendiya a te Ispanya, iyan, edtuluy a ziyān te keniyu. Ne emun egkeipus haazà is mevavà he kebpekiduma ku keniyu he igkelangan ku, ne egketevangan a keniyu zutun te kedhipanew ku. ²⁵Ne guntaan egenat ad su edhendiya a zè pa te inged he Hiruselim su zuen idtavang he ibpehated kedì diya te mēnge tumutuu te Megbevaya diya. ²⁶Su is mēnge tumutuu zini te prubinsya he Mesidunya, wey te prubinsya he Gerisya, neisip dan he meupiya ke ebegey zan te tavang diya te mēnge tumutuu he egkengeayuayu ziyà te inged he Hiruselim. ²⁷Uteu meupiya ziyà te gehinawa zan is kebegaya zan kayi te tavang, ne utew hustu zaan heini su zekelà is utang dan diya te mēnge tumutuu he Hudiyu ziyà te Hiruselim su pinaagi te mēnge Hudiyu neuwit dini te kandan te kenà mēnge Hudiyu is Lalag te Megbevaya, ne tenged kayi hustu zaan ke zuen selapì he igketavang dan diya te mēnge Hudiyu he egkengeayuayu. ²⁸Ne emun egketapus en heini is baal ku igkehated ku en heini is selapì he idtavang kandan, ne zutun edhipanew ad maan pehendiya te Ispanya ne edtuluy a ziyān te keniyu. ²⁹Ne netuenan ku he ke ebpekeuma a ziyān, utew zekelà is kedtuvazi kenitew ni Kristu pinaagi kayi te kebpehendiyan ku.

³⁰Mēnge suled, tenged te mahal ziyà te gehinawa niw is Nengazen tew he si Jesu Kristu wey tenged te kebpekedhihizuwè tew he ibegey kenitew te Wagas he Mulin-ulin, edhengyuan ku sikiyu he peniguduwi a keniyu iampù diya te Megbevaya. ³¹Iampù niw he kenà a mekeizi te mēnge etew he kenà tumutuu ziyà te inged he Hiruselim. Iampù niw zaan he ikelipey te mēnge tumutuu ziyà te Hiruselim heini is selapì he idhated ku kandan. ³²Ne emun egketapus heini, wey ke egkesuatan te Megbevaya, ebpekehendiyan a te keniyu he utew zekelà is kelipey ku ne egkehimu he ebmelinawen is ked-isip-isip ku pinaagi te kebpenumbaley ku ziyān te keniyu. ³³Is Megbevaya he iyan puunà te kelinew, berakat he ulini kew zin.

Mēnge Pengemusta

16 ¹Pinaagi kayi te surat ibpekilala ku keniyu si Febe is suled tew he vahi tenged kayi te kedtuu tew, ne edtavang sikandin te mēnge tumutuu ziyà te inged he Singkriya. ²Gelgelawa niw sikandin tenged te kedtuu zin te Nengazen tew su iyan heini ulaula he zait te mēnge tumutuu. Ne ke zuen mēnge keel-elangan din, ne tevangi niw sikandin su utew mezakel is midtevangen din daan he mēnge tumutuu ne midtevangen e zin daan.

³Ipengemusta a ki Priscila wey si Ekilu. Mēnge timbang ku sikandan te kedtumana ku te ebpeveelan kedì ni Jesu Kristu. ⁴Tenged te kedtevangi zan kediey wazè dan isepayan ke ebpatay zan, ne tenged kayi utew

zekelà is peselamat ku kandan. Ne kenà duen dà taman, su zekelà daan is peselamat kandan te langun he menge tumutuu zini he kenà menge Hudiyu. ⁵Ipengemusta a zaan te menge tumutuu he ziyà dà edtigumtigum te valey zan te ked-azap dan te Megbevayà.

Ipengemusta a zaan ki Ipinitu he utew ku emigu. Nehuna sikandin he maama he neketuu ki Kristu ziyà te prubinsya he Asya. ⁶Ipengemusta a zaan ki Maria; utew zekelà is baal zin wey kew zin metevangi.

⁷Ipengemusta a zaan ki Andruniku wey si Hunias. Menge zuma ku sikandan he Hudiyu he mibpirisu zuma kedì. Telehuzen sikandan te menge epustul, ne nehuna sikandan neketuu ki Kristu, ne human a.

⁸Ipengemusta a ki Empliyatu; utew ku sikandin emigu tenged te kedtuu zin te Nengazen. ⁹Ipengemusta a zaan ki Urbano te zuma ku he suluguen ni Kristu wey si Istakis he utew ku zaan emigu. ¹⁰Ipengemusta a ki Epilis. Netuenan te langun he metinumanen sikandin te menge sugù ni Kristu. Ipengemusta a te pemilya ni Eristubulu. ¹¹Ipengemusta a ki Hirudyun te zuma ku he Hudiyu wey ipengemusta a zaan te menge tumutuu he ziyà te valey ni Narciso.

¹²Ipengemusta a ki Tripina wey si Tripusa he menge megied he suluguen te Nengazen. Ipengemusta a zaan ki Persida he utew ku emigu. Utew zekelà is nehimu zin te kedtumana zin te ebpeveelan kandin te Nengazen. ¹³Ipengemusta a zaan ki Rufo. Nevantug en is kedtuu zin te Nengazen. Ipengemusta a zaan te iney zin he impeiring din is ked-isipa zin kedì te tuney en he anak din. ¹⁴Ipengemusta a ki Asinkritu, si Pligunti, si Hirmis, si Petrubas, si Hirmas wey is langun he menge maama he suled tew zaan he menge zuma zan. ¹⁵Ipengemusta a ki Pilulugu, wey ki Julia, ki Nereo, wey te etevey zin, wey ki Ulimpas, wey te menge sakup te Megbevayà he zuma zan.

¹⁶Ne sikiyu is langun diyan, emun edtigum kew pelimlimuey kew te uman sevaha keniyu. Ebpengemusta keniyu is menge tumutuu te langun he menge inged dini.

Is Penapus he Telaan

¹⁷Menge suled, edhengyuen ku keniyu he mebantey kew, ne likayi niw is menge etew he edsamuk te kebpekidsevaha niw wey kedtuu niw te menge tumutuu su edsupaken dan is tutuu he tuluuwen he impenurù keniyu. ¹⁸Su is menge etew he ed-ulaula te iring kayi, kenè dan edtumanen is sugù te Nengazen tew he si Kristu, kekenà, iyan dan edtumanen is kandan he menge suat. Pinaagi te ketau zan te kegkagi wey pinaagi te mekempet he egkegiyen dan, egkeekalan dan is isip te menge paglung he etew. ¹⁹Nevantug en is tudtul te kedtumana niw te menge sugù te Megbevayà, ne utew ku heini igkelihey. Egkesuatan ku he zekelà is ketau niw te ked-ulaula te meupiya ne egkesuatan ku zaan he kenè

kew metau te ked-ulaula te mezaat. ²⁰Ne emun iyan heini egkehitavù, is Megbevayà he iyan puunà te kelinew, megaan din en edhimuwa he mepurung niw mezaag si Setanas.

Berakat he ikegagew kew te Nengazen tew he si Jesu Kristu.

²¹Is duma ku te edsangyew te Lalag te Megbevayà, si Timoteo, ebpengemusta keniyu ne henduen ded daan si Lucio, si Jason wey si Susipatru, is menge zuma ku he Hudiyu.

²²(Siak, si Tiriku, iyan a impesurat kayi ni Pablo te surat din; ebpengemusta a zaan keniyu tenged te pudu kiw menge tumutuu ki Kristu.)

²³Ebpengemusta zaan keniyu si Gayu. Siak si Pablo, kayi a ed-ubpà te valey zin ne zini edsimba is menge tumutuu kayi te inged. Is Trisuriru kayi te inged he si Irastu wey is suled tew te kedtuu he si Kuwartu, ebpengemusta zan keniyu.

²⁴Sikiyu is langun, berakat he ikegagew kew te Nengazen tew he si Jesu Kristu.

Is Kedeliga te Megbevayà

²⁵Edeligen tew is Megbevayà! Pinaagi te Meupiya he Tudtulanen he ibpenudtul ku he iyan is mehitenged ki Jesu Kristu, wey pinaagi te tuluuwen he neuget he timpu is ked-elesa zuen te Megbevayà, egkehimu he edhegeten din is kedtuu niw. ²⁶Ne haazà is tuluuwen he in-eles dengan, impezayag en te Megbevayà pinaagi te menge surat dengan te menge ebpeneuven din. Ne geina te iyan sugù te wazè din kemetayen he Megbevayà, idsangyew en heini is tuluuwen diyà te menge etew ziyà te minsan hendei su wey meketuu is langun ne ebpeketuman te menge sugù din.

²⁷Is sebsevaha zà he Megbevayà he iyan dà nesayud te minsan hengkey, berakat he wazà pidtemanan te kedeliga kandin pinaagi ki Jesu Kristu.